



PL
2683
A1
1746
v4

碑銘四首

尚書戶部郎中贈右諫議大夫曾公神道碑

一作銘并序墓誌

公諱致堯字某撫州南豐人也少知名江南

一本作少有大

走以文當李氏時不就鄉里之舉李氏亡太平興國


八年

一有

舉進士及第為符離主簿累遷光祿寺丞

監越州酒稅數上書言事獻文章太宗時召拜著

作佐郎直史館使行視汴河漕運稱旨遷秘書丞為





居士集卷第二十一

集二十一

碑銘四首



尚書戶部郎中贈右諫議大夫曾公神道碑

一作墓誌銘并序

公諱致堯字某撫州南豐人也少知名江南一本作少有大

志以文行知名當李氏時不就鄉里之舉李氏亡太平興國

八年一有始字舉進士及第為符離主簿累遷光祿寺丞

監越州酒稅數上書言事獻文章太宗奇之召拜著

作佐郎直史館使行視汴河漕運稱古遷秘書丞為

兩浙轉運使諫議大夫魏庠知蘇州恃舊恩多不法

吏莫敢近公

一本有曰此吾職也

劾其狀以聞太宗驚曰是敢

治魏庠可畏也卒為公罷庠洛苑使楊允恭以言事

見幸無不聽事有下公常厝不行允恭以訴太宗遣

使問公公具言其不可

一本下有此事卒不行

公既繩其大而人

所難者至其小易則務為寬簡歲終其課為最徙知

壽州壽近京師諸豪大商

一作姓

交結權貴

一本作豪又有恃其

聲

勢號為難治公居歲餘諸豪斂手莫

一作不

敢犯公法

人亦莫見其以何術而然也

一本下有夫敢以法加諸豪乃彊吏之所能爾

使諸豪不敢干其法此爲法之本意而人之難也故公於壽尤有惠愛既去壽

人遮留數日以一騎從二卒逃去過他州壽人猶有追之者再遷主客員外郎判三司鹽鐵勾院是時李繼捧以銀夏五州歸朝廷其弟繼遷亡入磧中爲寇太宗遽遣繼捧往招之至則誘其兄以陰合卒復圖而囚之自陝以西既苦兵矣真宗初即位益欲來以恩德許還其地使聽約束公獨以謂繼遷反覆一有如此字不可予繼遷已得五州後二年果叛圍靈武議者又欲予之公益爭以爲不可言雖不從真宗知其材

將召以知制誥而大臣有不可者乃已出爲京西轉

運使王均伏誅奉使安撫西川誤留詔書于家其副

潘惟岳

一作吉

教公上言渡吉柏江舟破亡之

一有以可字

自解公曰爲臣而欺其君吾不能爲也乃上書自劾

釋不問其後惟岳

一作吉

入見禁中道蜀事具言公所

自劾者真宗嗟歎久之繼遷兵既久不解丞相張齊

賢經略環慶以西署公判官以從公曰西兵十萬皆

屬王超超材既不可專任

一有事

而兵多勢重非易可

指麾若不得節度諸將事必不集真宗難其言爲詔

陝西聽經略使得自發兵而已

一無而已

公度言終不會

乃辭行會召賜金紫公謝曰臣嘗言丞相某事未効不敢受賜由是貶黃州團練副使公已貶而王超兵敗繼遷破清遠軍朝廷卒亦棄靈州公貶逾年復爲戶部員外郎知泰州丁母憂服除拜吏部員外郎知泉州徙知蘇州又徙知揚州上疏論事語斥大臣尤切當時皆不悅又徙知鄂州坐知揚州

一有誤入添日字

支俸多一月雖嘗自言猶貶監江寧府酒稅用封禪

恩累遷戶部郎中大中祥符五年五月某日卒于官

享年六十有六遺戒無以佛汚我家人如其言公之

曾祖諱某某官曾祖妣某氏某縣君祖諱某某官祖

妣某氏某縣君考諱某某官妣某氏某縣君子男七

人曰某

一本曰某二字作某等

女若干人用其子易占恩再遷

右諫議大夫初塋南豐之東園水壞其墓某年月日

改塋龍治

一作津

鄉之源

一作原

頭慶曆六年夏其孫輩

稱其父命以

一有公之事

來請曰願有述遂爲之述曰維

魯氏始出於鄆鄆爲姒姓之國微不知其始封春秋

之際莒滅鄆而子孫散亡其在魯者自別爲魯氏蓋

自鄆遠出於禹歷商周千有餘歲常微不顯及爲曾

氏而歲參元西始有聞于後世而其後又晦復千有

餘歲而至于公

一作千有餘歲而又顯於公焉

夫晦顯常相反覆

一作

復

而世德之積者久則其發也宜非一二世而止矧

公之有不得盡施而有以遺其後世乎是固不宜無

銘者已公當太宗真宗時言事屢見聽用自言西事

不合而出遂以卒于外然在外所言

一本作然其在外所言尤多

如在朝廷而任言責者

一本無者

至其難言則人有所不

敢言者予於其論議既不能盡載而亦有所不得載

也取其初不見用久而益可思者一本有將特詳焉所以

見公之志也銘曰

公於事明由學而知先知逆決一本作逆 夾藏否有若著龜

告而不欺不顧從違初雖不信後必如之公所論議

一作敢人之難古稱君子有德有言德畜不施言猶

可聞銘而不朽公也長存

尚書度支郎中天章閣待制王公神道碑銘

并序

公諱質字子野其先大名莘人自唐同光初公之皇

曾祖魯公舉進士第一顯名當時官至右拾遺歷有

仕字

晉漢周而皇祖晉公益以文章有大名逮事太祖

太宗官至兵部侍郎當真宗時伯父文正公居中書
二十餘年天下稱為賢宰相今天子慶曆三年公與
其弟素皆待制天章閣自同光至慶曆蓋百有二十
餘年王氏更四世世一作代有顯人或以文章或以功
德公生累世富貴而操履甚於寒士性篤孝悌厚於
朋友樂施與以賙人而妻子常不自給視榮利淡若
無意平居苦疾病退然如不自勝及臨事介然

一有不可

回奪字

有仁者之勇君子之剛樂人之善如自己出初

范仲淹以言事貶饒州方治黨人甚急公獨扶病率子弟餞于東門留連數日大臣有以讓公曰長者亦爲此乎何苦自陷朋黨公徐對曰范公天下賢者顧其何敢望之然若得爲黨人公之賜其厚矣聞者爲公縮頸其爲待制之明年出守于陝又明年小人連構大獄坐貶廢者十餘人皆公素所賢者聞之悲憤歎息或終日不食

一本有語于人曰善人若此吾不樂在世矣

因數劇飲

大醉公既素病益以酒遂卒公初以廕補太常寺太

祝監都進奏院獻其文章召試賜進士及第校勘館
閣書籍遂爲集賢校理通判蘇州州守黃宗旦負材
自喜頗以新進少公議事則曰少年乃與丈人爭事
耶公曰受命佐君事有當爭職也宗旦雖屢屈折而
政常得無失稍德公助已爲之加禮宗旦得盜鑄錢
者百餘人以詫一作公公曰事發無跡何從得之曰
吾以術一有陰字鉤出之公愀然曰仁者之政以術鉤人
寘之死而又喜乎宗旦慚服悉緩出其獄始大稱公
曰君子也判尚書刑部吏部南曹知蔡州始至發大

姦吏一人去之繩諸豪猾以法與轉運使爭曲直事
有下而不便者皆格不用既去其害政者然後崇學
校一以仁恕臨下其政知寬猛必使吏畏而民愛其
爲他州州率大而難治必常有善政皆用此入爲開
封府推官已而其兄雍爲三司判官公曰省府皆要
職吾豈可兄弟居之求知壽州徙廬州盜有殺其徒
而并其財者獲之寘于法大理駁曰法當原公以謂
盜殺其徒而自首者原之所以疑壞其黨而開其自
新若殺而不首既獲而亦原則公行爲盜而第殺一

人既得兼其財又可以贖罪不獲則肆為盜

一本公行為盜

以相殺兼其財不獲則為盜

獲則引以自原如此盜不可止非法

意疏三上不能爭公嘆曰吾不勝法吏矣乃上書自

劾請不坐佐吏公坐貶監靈仙宮其後議者更定不

首之罪

一作其後韓某知審刑院議正首之罪

卒用公言

一作議

為是而

公貶猶不召資政殿學士鄭戩翰林學士葉清臣訟

公無罪始起知泰

一本一作秦

州遷荆湖北路轉運使當用

一作治

兵西方急於財用之時獨不進羨餘其賦歛近

寬平治以常法故他路不勝其弊而荆湖之人自若

一作獨
若平日

權知荆南府民有訟婚者訴曰貧無貲故後

期間其用幾何以俸錢與之使婚獲盜竊人衣者曰

一本有平
生不爲過

迫於飢寒而爲之公爲之哀憐取衣衣之

遣去荆人比公爲子產召爲史館修撰遂拜天章閣

待制判吏部流內銓號爲稱職而於選法未嘗有所

更易人或問之公曰選法具備如權衡在執者不欺

其輕重耳何必屢更其法

一作器

是歲天子開天章閣

召大臣問天下事以手詔責范公等

一本作是時天
子感悟黨人說

進用范公
等在左右

而議事者爭言天下利害務欲更革諸事

公獨無一言問之則曰吾病未能也公於榮利既薄

臨禍福不為喜懼其視世事若無一可以動其心者

惟以天下善人君子亨否為己休戚遂以此卒此其

為志豈小哉豈有一作以病而不能者哉公誠素病而

任之以事所至必皆有為使其壽且不死而用其必

一作如有所為一本而任之大用豈其不欲空言而已

一本已者哉嗚呼公享年一作公四十有五官至度

支郎中階朝奉大夫勲上護軍爵平晉男娶周氏某

縣君生子某曾祖諱某祖諱某皆贈太師尚書中書

令考諱某官至兵部郎中有賢行贈戶部尚書公以
某年某月某日卒于陝某年某月某日塋于某所先
塋之次銘曰

仕不爲利以行其仁處豐自薄而清厥身其仁誰思
不在吏民其清孰似一作嗣以遺子孫一作有生雖有銘止歿也長存
以昭之以告後人

袁州宜春縣令贈太師中書令兼尚書令冀

國公程公神道碑銘

并序

上即位之十有六年

一有以字

今鎮安軍節度使檢校太

師同中書門下平章事程公自三司使吏部侍郎爲

叅知政事乃詔有司罷其祖考於是贈其皇考故袁

州宜春縣令爲太子少師公在政事遷尚書左丞又

贈太子太師其爲資政殿學士工部尚書又贈太師

中書令其爲宣徽北一作南院使武昌軍節度使又贈

兼尚書令其爲武勝軍節度使同中書門下平章事

追封定國公徙鎮鎮安一作徙鎮安軍又追封冀國公惟冀

國一無此三字公諱某字某少舉明經仕不得志退居于

家畜德不施貽其後世而相國大師實爲之子初以

文學舉進士高第歷館閣掌制命儁德偉望顯于朝廷遂爲中丞執國之憲尹正京邑有聲蜀都乃由三司入與大政公亦自大常博士累贈兵部侍郎遂遷太師中書尚書令位皆一品有國定冀以啓其封雖發不自躬而其施益遠晦於一時而顯於百世蓋夫享于身者有時而止施于後者其耀無窮表于其鄉以勸爲善可謂仁人之利博矣惟程氏之先自重黎歷夏商周而程伯休父始見於詩書其後世遠而分至唐定氏族而程氏之望分爲七中山之程蓋出於

魏安鄉侯昱之後也公世爲中山博野人曾祖諱某
祖諱某贈太師祖妣齊氏吳國夫人考諱某贈太師
中書令妣吳氏秦國夫人當唐末五代天下亂於兵
程氏再世不仕後唐長興三年公之皇考以神童舉
官至太子贊善大夫宋興一本有天下於今百年而程氏
亦再顯太平興國初公之從祖羽佐太宗自晉王即
皇帝位爲明文殿學士官至兵部侍郎今相國太師
出入將相爲時名臣子孫蕃昌世族昭著推其所自
來者遠矣初公與其仲父象明同舉春秋皆中第是

時從祖以給事中知開封府召公及衆明謂曰吾新

被寵天子待罪于此不欲子弟並登科

一有選字

使其自

擇去就公因讓其從父自引去從祖頗賢之其後累

舉不中從祖謂曰由我困汝退而使人察公無悔色

由是大嗟異之以爲不可及太平興國五年遂以明

經中第爲虔州贛縣尉蔡州上蔡主簿袁州宜春令

所至皆有惠愛公事母至孝與其兄弟怡怡爲鄉里

所稱而仕宦不求名譽爲贛縣尉七年不代既罷宜

春遂不復仕退居于蔡州淳化三年七月某日

一作甲子

以疾卒于家享年四十有九以天聖十年十一月某

日

一作甲子

塋于鄭州管城縣馬亭鄉之北田村夫人楚

氏追封晉國夫人子男五人長曰瓘官至太常博士
次曰瑗曰琬皆早卒次曰琳相國太師也次曰琰國
子博士女一人適某人諸孫九人銘曰

遠矣程侯顓頊之苗始自重黎歷夏商周惟伯休父
聲施孔昭世不絕聞盛于有唐程分爲七三祖安鄉
廣平中山以暨濟陽中山之程出自靈洗實昱裔孫
仕于陳季陳滅散亡播而北遷公世中山爲博野人

道德家潛孝弟邦聞不耀自躬以貽後昆惟後有人
將相文武有國寵章覆其考祖定冀之封實開土宇
程世其隆公多孫子有畜其源發而孰禦刻銘高原
以示來者

鎮安軍節度使同中書門下平章事贈太師

中書令程公神道碑銘

并序

惟文簡公既塋之二年其子嗣隆泣而言于

一作於朝

曰先臣幸得備位將相官階品階第一爵勲階第二
請得立碑如今於是天子曰噫惟爾父琳有勞于我

國家余其可忘乃大書曰旌勞之碑遣中貴人即賜其家曰以此名爾碑又詔史臣修曰汝爲之銘臣修與文簡公故徃來知其人又嘗誌其墓又嘗述其世德以冀公太師之碑得其世次官封功行最詳乃不敢辭惟公字天球姓程氏曾祖諱新贈太師曾祖妣吳國夫人齊氏祖諱贊明贈太師中書令祖妣秦國夫人吳氏考諱元白袁州宜春令贈太師中書令兼尚書令冀國公妣晉國夫人楚氏公舉大中祥符四年服勤詞學高第試秘書省校書郎泰寧軍節度推

官改著作佐郎知并州壽陽縣秘書丞監佐藏庫天禧中詔選文學履行召試直集賢院今天子即位遷太常博士三司戶部判官會修真宗實錄而起居注闕命公追修大中祥符八年已後書成遂修起居注遷祠部員外郎提舉諸司庫務以本官知制誥同判吏部流內銓契丹嘗遣使賀上即位命公迓之使者妄有所言公折以理遂屈服其後又遣使賀天聖五年乾元節天子思公前嘗折其使乃以公爲館伴使使者果言契丹見中國使者坐殿上位次高而中國

見契丹使者位下當遷議者以爲小故可許雖天子亦將許之公爭以謂契丹所以與中國好者守先帝約也一切宜用故事若許其小將啓其大天子是之乃止歲中遷右諫議大夫權御史中丞丞相張文節公少所稱許而最知公方除中丞文節當執筆喜曰不辱吾筆矣明年拜樞密直學士知益州公性方重寡言笑凡所處畫常先慮謹備所以條目巨細甚悉至臨事簡嚴僚吏莫能窺其際嘗夜張燈會五門大集州民而城中火起吏如公教不以白而隨即救止

終宴民去始稍知火監軍得告者言軍謀變懼而入
白公笑曰豈有是哉監軍惶惑不敢去公曰軍中動
靜吾自知之苟有謀者不能隱也已而卒無事其他
多類此蜀妖人自名李冰神子署官屬吏卒以恐蜀
人公捕斬之而謗者言公安殺人蜀且亂天子遣人
馳視之使者還言蜀人便公政方安樂而誅妖人所
以止亂由是天子益知公賢召爲給事中知開封府
前爲府者苦其治劇或不一無字滿歲罷不然被謗譏
或以事去獨公居數歲久而治益精明盜訟稀少獄

屢空詔書數下褒美遷工部侍郎龍圖閣

一有直字學士

守御史中丞久之天子思其治召爲翰林

一有侍讀字學

士復知開封府明年爲三司使不悅苟利不貪近功

時議者患民稅多目吏得爲姦欲除其名而合爲一

公以謂合而沒其名一時之便後有興利之臣必復

增之是重困民也議者莫能奪其於出入尤謹禁中

時有所取未嘗肯予宦官怒言陛下雖有一作所欲物

在程某何可得公曰臣所以爲陛下惜爾天子以爲

然累遷吏部侍郎景祐四年以本官參知政事

一有遷尚

書左丞

公益自信不疑宰相有所欲私輒衆折之其語
至今士大夫能道也初范仲淹以言事忤大臣貶饒
州已而上悔悟欲復用之稍徙知潤州而惡仲淹者
遽誣以事語入上怒亟命置之嶺南自仲淹貶而朋
黨之論起朝士牽連出語及仲淹者皆指爲黨人公
獨爲上開說上意解而後已是時元昊叛河西朝廷
多故公在政事補益尤多而小人僥倖皆不便遂以
事中之坐貶爲光祿卿知潁州已而徙知青州又徙
大名府居一歲中遷戶部吏部二侍郎尚書左丞資

政殿學士北京建遂以爲留守宦者皇甫繼明方用
事主治行宮務廣制度以市恩公爲裁抑之與繼明
章交上天子遣一御史徃視之還直公天子爲罷繼
明獨委公以建都事公自知政事以論議不私見嫉
被貶斥已稍復見用遂與繼明爭曲直由是益不妄
合於世雖不復大用而契丹方遣使數有所求兵誅
元昊未克西北宿重兵公於是時天子常委以河北
陝西之重留守北京凡四年遷工部尚書資政殿大
學士河北安撫使慶曆六年拜武昌軍節度使陝西

安撫使知永興軍府事明年加宣徽北院使鄜延路
經略使馬步軍都部署判延州仍兼陝西安撫使皇
祐元年加同中書門下平章事留守北京其於二方
威惠信著尤知夷狄情僞山川險易行師制敵之要
其在延州夏人數百驅畜產至界上請降言契丹兵
至衙頭矣國且亂願自歸公曰契丹兵至元昊帳下
當舉國取之豈容有來降者乎聞夏人方捕叛族此
其是乎不然誘我也拒而不受已而夏人果以兵數
萬臨界上公戒諸堡塞無得數輒一作出兵夏人以爲

有備引去自此不復窺邊公於河北最久民愛之爲

立生祠明年改武勝軍節度使猶在北京又改鎮安

軍節度使在鎮四年猶上書鎮安一郡爾不足以自

効願復守邊書未報得疾以至和三年一作嘉祐元年閏三

月七日己丑薨于陳州之正寢享年六十有九天子

輟視朝二日贈中書令謚曰文簡一本有以嘉祐二年十月十八日塋

河南府伊闕縣神陰鄉張劉里明年祫享太廟推恩加贈公太師尚

書令公累階至開府儀同三司勲上柱國廣平郡爵

公封戶七千四百而實封貳阡壹伯賜號推誠保德

守正翊戴功臣娶陳氏封衛

一作陳

國夫人子男四人

曰嗣隆大常博士嗣弼殿中丞嗣恭太常博士嗣先
大理寺丞女五人皆適良族謹按程氏之先出自重
黎至休父爲周司馬國於程其後子孫遂以爲氏自
秦漢以來世有其人程氏必顯而各以其所居著姓
後世因之至唐尤盛號稱中山程氏者皆祖魏安鄉
侯昱公中山博野人也世有積德至公始大顯聞臣
修以謂古者功德之臣進受國寵退而銘於器物非
獨私其後世所以不忘君命示國有人而詩人又播

其事聲於詠歌以揚無窮今去古遠爲制不同而猶有幽堂之石隧道之碑得以紀德昭烈而又幸蒙天子書而名之其所以照臨程氏恩厚寵榮出古遠甚而臣又得刻銘其下銘臣職也懼不能稱銘曰

程以國氏世遠支分因居著姓各以其人公世中山在昔有聞克大自公厥聲以振乃秉國鈞乃授將鉞出入其勤險夷一節帝曰噫歟余有勞臣何以旌之有爛其文惟此勞臣實余同德憂國在心匪勞以力二方有事諸將無功俾我舊老不遑居中間息近藩

庶休厥躬有請未

一作其

報奄云其終歿而後已茲可

謂忠惟帝之褒其言甚簡銘以述之萬世丕顯

跡以因天世並支今因故蕃故各以其人公世
而引入梓後論其不終引鄉山雖不終引鄉山
子書而多之其所以鄉山跡以引鄉山跡以引鄉山
而少堂之石刻道之鄉山以鄉山跡以引鄉山跡以引鄉山
其筆勢依精烟以縣無限今去古並公述不同而辭

居士集卷第二十二

集二十二

碑銘二首

太尉文正王公神道碑銘

并序

至和二年七月乙未樞密直學士右諫議大夫王素
奏事殿中已而泣且言曰臣之先臣旦相真宗皇帝
十有八年今臣素又得待罪侍從之臣惟是先臣之
訓其遺業餘烈臣實無似不能顯大而墓碑至今無
辭以刻惟陛下哀憐不忘先帝之臣以假寵於王氏
而勗其子孫天子曰嗚呼惟汝父旦事我文考真宗

叶德一心克終厥位有始有卒其可謂全德元老矣

汝素以是刻于碑素拜稽首

一有泣而

出明日有詔史館

修撰歐陽修曰王旦墓碑未立汝可以銘臣修謹按

故推誠保順同德守正翊戴功臣開府儀同三司守

太尉充玉清昭應宮使上柱國太原郡開國公贈太

師尚書令兼中書令追封魏國公

一作上柱國魏國公食邑一萬三千

戶食實封六千五百戶贈太師尚書令

謚曰文正王公諱旦字子明大

名莘人也皇曾祖諱言滑州黎陽令追封許國公皇

祖諱徹左拾遺追封魯國公皇考諱祐尚書兵部侍

卽追封晉國公皆累贈太師尚書令兼中書令曾祖
妣姚氏魯國夫人祖妣田氏秦國夫人妣任氏徐國
夫人邊氏秦國夫人公之皇考以文章自顯漢周之
際逮事太祖太宗爲名臣嘗諭杜重威使無反漢拒
盧多遜害趙普之謀以百口明符彥卿無罪故世多
稱王氏有陰德公之皇考亦自植三槐于庭曰吾之
後世必有爲三公者此其所以志也公少好學有文
太平興國五年進士及第爲大理評事知臨平一作江
縣監潭州銀場再遷著作佐卽與編文苑英華遷殿

中丞通判鄭濠二州王禹偁薦其材任轉運使驛召
至京師辭不受獻其所爲文章得試直史館遷右正
言知制誥知淳化三年禮部貢舉遷虞部員外郎同
判吏部流內銓知考課院右諫議大夫趙昌言參知
政事公以壻避嫌求解職太宗嘉之改禮部郎中集
賢殿修撰昌言罷復知制誥仍兼修撰判院事召賜
金紫久之遷兵部郎中居職真宗即位拜中書舍人
數日召爲翰林學士知審官院通進銀臺封駁事公
爲人嚴重能任大事避遠權勢不可干以私由是真

宗益知其賢錢若水名能知人常稱公曰真宰相器也若水爲樞密副使罷召對苑中問誰可大用者若水言公可

一有用字一有大用二字

真宗曰吾固已知之矣咸平

三年又知禮部貢舉居數日拜給事中知樞密院事明年以工部侍郎叅知政事再遷刑部侍郎景德元年契丹犯邊真宗幸澶州雍王元份留守東京得暴疾命公馳自行在代元份留守二年遷尚書左丞三年拜工部尚書同中書門下平章事集賢殿大學士監修國史是時契丹初請盟趙德明亦納誓約願守

河西故地二邊兵罷不用真宗遂欲以無事治天下
公以謂宋興三世祖宗之法具在故其爲相務行故
事慎所改作進退能否賞罰必當真宗久而益信之
所言無不聽雖他宰相大臣有所請必曰王某以謂
如何事無大小非公所言不決公在相位十餘年
無夷狄之虞兵革不用海內富實羣工百司各得其
職故天下至今稱爲賢宰相公於用人不以名譽必
求其實苟賢且材一作能矣必久其官而一無而字衆以爲
宜某職然後遷其所薦引人未嘗知寇準爲樞密使

當罷使人私告

一作

公求爲使相公大驚曰將相之任

豈可求邪且吾不受私請準深恨之已而制出除準
武勝軍節度使同中書門下平章事準入見泣涕曰
非陛下知臣何以至此真宗具道公所以薦準者準
始媿歎以爲不可及故叅知政事李穆子行簡有賢
行以將作監丞居于家真宗召見慰勞之遷太子中
允初遣使者召之

一無
之字

不知其所止真宗命至中書

問王其然後人知行簡公所薦也公自知制誥至爲
相薦士尤多其後公薨史官修真宗實錄得內出奏

章乃知朝廷之士多公所薦者公與人寡言笑其語雖簡而能以理屈人默然終日莫能窺其際及奏事上前羣臣異同公徐一言以定今上爲皇太子太子諭德見公稱太子學書有法公曰諭德之職止於是邪趙德明言民飢求糧百萬斛大臣皆曰德明新納誓而敢違請以詔書責之真宗以問公公請勅有司具粟百萬於京師詔德明來取真宗大喜德明得詔書慚且拜曰朝廷有人大中祥符中天下大蝗真宗使人於野得死蝗以示大臣明日佗宰相有袖死蝗

以進者曰蝗實死矣請示于一作於朝率百官賀公獨

以爲不可後數日方奏事飛蝗蔽天真宗顧公曰使

百官方賀而蝗如此豈不爲天下笑邪宦者劉承規

一作珪以忠謹得幸病且死求爲節度使真宗以語公

曰承規一作珪待此以瞋目公執以爲不可曰他日將

有求爲樞密使者奈何至今內臣官不過留後公任

事久人有謗公於上者公輒引咎未嘗自辨至人有

過失雖人主盛怒可辨者辨之必得而後已榮王宮

火延前殿有言非天災請置獄劾火事當坐死者百

餘人公獨請見曰始失火時陛下以罪已詔天下而臣等皆上章待罪今反歸咎於人何以示信且火雖有迹寧知非天譴邪由是當坐者皆免日者上書言宮禁事坐誅籍其家得朝士所與往還占一作書問吉凶之說真宗怒欲付御史問狀公曰此人之常情且語不及朝廷不足罪真宗怒不解公因自取嘗所占問之書進曰臣少賤時不免爲此必以爲罪願并臣付獄真宗曰此事已發何可免公曰臣爲宰相執國法豈可自爲之幸於不發而以罪人真宗意解公至

中書悉焚所得書既而真宗悔復馳取之公曰臣已
焚之矣由是獲免者衆公累官至太保以病求罷入
見滋福殿真宗曰朕方以大事託卿而卿病一作疾如
此因命皇太子拜公公言皇太子盛德必任陛下事
因薦可爲大臣者十餘人其後不至宰相者李及凌
策二人而已然亦皆爲名臣公屢以疾請真宗不得
已拜公太尉兼侍中五日一朝視事遇軍國大事不
以時入參決公益惶恐因卧不起以疾懇辭冊拜太
尉玉清昭應宮使自公病使者存問日常三四真宗

手自和藥賜之疾亟遽幸其第賜以白金五千兩辭
不受以天禧元年九月癸酉薨于家享年六十有一
真宗臨哭輟視朝三日發哀于苑中其子弟門人故
吏皆被恩澤即以其年十一月庚申葬公於開封府
開封縣新里鄉大邊村公娶趙氏封榮國夫人後公
五年卒子男三人長曰司封郎中雍次曰贊善大夫
冲次曰素女四人長適太子太一作少傅韓億次適兵
部員外郎直集賢院蘇耆次適右正言范令孫次適
龍圖閣直學士兵部郎中呂公弼一本有諸孫十四人公事寡

嫂謹與其弟旭相

一無相字

友悌尤篤任以家事一無所

問而務以儉約率勵子弟使在富貴不知爲驕侈

一作

後

兄子睦欲舉進士公曰吾常以大

一作太

盛爲懼其

可與寒士爭進至其薨也子素猶未官遺表不求恩

澤有文集二十卷乾興元年詔配享真宗廟庭臣修

曰景德祥符之際盛矣觀公之所以相而先帝之所

以用公者可謂至哉是以君明臣賢德顯名尊生而

俱享其榮歿而長配於廟可謂有始有卒如明詔所

褒昔者烝民江漢推大臣下之事所以見任賢使能

之功雖曰山甫穆公之詩實歌宣王之德也臣謹考
國史實錄至於摺紳故老之傳得公終始之節而錄
其可紀者輒聲一無聲字爲銘詩昭示後世一無上四字以彰
先帝之明以稱聖恩褒顯王氏流澤子孫與宋無極
之意銘曰

烈烈魏公相我真宗真廟翼翼魏公配食公相真宗
不言以躬時有大事事有大疑匪卜匪筮公爲著龜
公在相位終日如默問其夷狄包裹兵革問其卿士
百工以職問其庶民耕織衣食相有一作所賞罰功當

罪明相所

一作有

黜升惟否惟能執其權衡萬物之平

孰不事君胡能必信孰不爲相其誰有終公薨于位
太尉之崇天子孝思來薦清廟侑我聖考惟時元老
天子念功報公之隆春秋從享萬祀無疆作爲詩歌
以諗廟工

觀文殿大學士行兵部尚書西京留守贈司

空兼侍中晏公神道碑銘

并序

至和元年六月觀文殿大學士行兵部尚書西京留
守臨淄公以疾歸于京師八月疾少間入見天子曰

噫予舊學之臣也乃留侍講邇英閣詔五日一朝前

殿明年正月疾作不能朝敕

一作飭

太醫朝夕往視有

司除道將幸其家公歎曰吾無狀乃以疾病憂吾君
即馳奏曰臣疾少間行愈矣乃止其月丁亥以公薨
聞天子震悼亟臨其喪以不即視公爲恨贈公司空
兼侍中謚曰元獻有司請輟視朝一日詔特輟二日
以其年三月癸酉塋公于許州陽翟縣麥秀鄉之北
原旣塋賜其墓隧之碑首曰舊學之碑旣又勅史臣
修考次公事具書于碑下臣修伏讀國史見真宗皇

帝時天下無事天子方推讓功德祠祀天地山川講
禮樂以文頌聲而儒學文章雋賢偉異之人出公世
家江西之臨川年始十四一起田里進見天子時
方親閱天下貢士會廷中者千餘人與夫宮臣衛官
擁列圍視公不動聲氣操筆爲文辭立成以獻天子
嘉賞賜同進士出身遂登館閣掌書命以文章爲天
下所宗逮陛下養德東宮先帝選用臣屬即以公遺
陛下由王宮宮臣卒登宰相凡所以輔道聖德憂勤
國家有舊有勞自始至卒五十餘年公旣薨而先帝

之名臣與陛下東宮之舊人皆無在者宜其褒寵優異比公甘盤臣修幸得執筆史官奉明詔謹昧死上臨淄公事曰公諱殊字同叔姓晏氏其世次晦顯徙遷不常自其高祖諱墉唐咸通中舉進士卒官江西始著籍于高安其後三世不顯曾祖諱延昌又徙其籍于臨川祖諱郃追封英國公考諱固追封秦國公自曾祖已下皆用公貴累贈開府儀同三司太師中書令兼尚書令曾祖妣張氏陳國太夫人祖妣傅氏許國太夫人妣吳氏唐一作越國太夫人公生七歲知

學問

一作始學知

爲文章鄉里號爲神童故丞相張文節

公安撫江西

一作南

得公以聞真宗召見旣賜出身後

二日又召試詩賦論公徐啓曰臣嘗私習此賦不敢

隱真宗益嗟異之因賜以它題以爲秘書省正字置

之秘閣使得悉讀秘書命故僕射陳文僖公視其學

明年獻其所爲文召試中書遷太常寺奉禮郎封祀

太山推恩遷光祿寺丞數月充集賢校理明年遷著

作佐郎丁父憂去官已而真宗思之即其家起復命

淮南發運使具舟送之

一作至

京師從祀太清宮賜緋

衣銀魚同判太常禮院又丁母憂求去官服喪不許
今天子始封昇王公以選爲府記室參軍再遷左正
言直史館今天子爲皇太子以戶部員外郎充太子
舍人賜金紫知制誥判集賢院遷翰林學士充景靈
宮判官太子左庶子兼判太常寺知禮儀院公既以
道德文章佐佑東宮真宗每所諮訪多以方寸小紙
細書問之由是參與機密凡所對必以其藁進示不
洩其後悉閱真宗閣中遺書得公所進藁類爲八十
卷藏之禁中人莫之見也初真宗遺詔章獻明肅太

后權聽軍國事宰相丁謂樞密使曹利用各欲獨見
奏事無敢決其議者公建言羣臣奏事太后垂簾
聽之皆毋得見議遂定乾興元年拜右諫議大夫兼
侍讀學士遷給事中景靈宮副使判吏部流內銓以
易侍講崇政殿遷禮部侍郎知審官院爲樞密副使
遷刑部侍郎上䟽論張耆不可爲樞密使由是忤太
后旨坐以笏擊其僕誤折其齒罷留守南京大興學
校以教諸生自五代以來天下學廢興自公始召拜
御史中丞改兵部侍郎兼秘書監資政殿學士翰林

侍讀學士知天聖八年禮部貢舉明年爲三司使復
爲樞密副使未拜改參知政事遷尚書左丞太后謁
太廟有請服袞冕者太后以問公公以周官后服對
太后崩大臣執政者皆罷一有以字公爲禮部尚書知毫
州徙知陳州遷刑部尚書復召爲御史中丞又爲三
司使知樞密院事拜樞密使再加檢校太尉同中書
門下平章事慶曆三年三月遂以刑部尚書居相位
充集賢殿大學士兼樞密使自公復召用而趙元昊
反師出陝西天下弊於兵公數建利害請罷監軍

以陣圖授諸將使得應敵爲攻守及制財用爲

一無爲字

出入之要皆有法天子悉爲施行自宮禁先以率天下而財賦之職悉歸有司卒能以謀臣元昊使聽約東乃還其王號公爲人剛簡遇人必以誠雖處富貴如寒士樽酒相對歡如也得一善稱之如已出當世知名之士如范仲淹孔道輔等皆出其門及爲相益務進賢材當公居相府時范仲淹韓琦富弼皆進用至於臺閣多一時之賢天子旣厭西兵閔天下困弊奮然有意遂欲因羣材以更治數詔大臣條天下事

方施行而小人權倖皆不便明年秋會公以事罷而仲淹等相次亦皆去事遂已公既罷以工部尚書知潁州徙知陳州又徙許州三遷戶部尚書拜觀文殿大學士知永興軍充一路都部署安撫使徙知河南府兼西京留守累進階至開府儀同三司勲上柱國爵臨淄公食邑萬二千戶實封三千七百戶公享年六十有五自少篤學至其病亟猶手不釋卷有文并二百四十卷嘗奉勅修上訓及真宗實錄又集類古今文章爲集選二百卷其一作公爲政敏而務以簡便

其民其於家嚴子弟之見有時事寡姊孝謹未嘗爲子弟求恩澤其在陳州上問宰相曰晏某居外未嘗有所請其亦有所欲邪宰相以告公公自爲表問起居而已故其薨也天子尤哀悼之賜予加等以其子

承

一作成下同

裕爲崇文院檢討孫及甥之未官者九人

皆命以官公初娶李氏工部侍郎虛已之女次孟氏屯田員外郎虛舟之女封鉅鹿郡夫人次王氏太師尚書令超之女封榮國夫人子八人長曰居厚大理評事早卒次承裕尚書屯田員外郎宣禮贊善大夫

崇讓著作佐郎明遠祗德皆大理評事幾道傳正皆
太常寺太祝女六人長適戶部侍郎同中書門下平
章事富弼次適禮部侍郎三司使楊察其四尚幼孫
十有二一作三人公既樂善而稱爲知人士之顯于朝
者多公所薦達至擇其女之所從又得二人者如此

一有鳴呼字

可爲賢也已銘曰

有姜之裔齊爲晏氏齊在春秋晏顯諸侯傳載桓子
嬰稱于邱其後無聞不亡僅存有煒自公厥聲以振
公之顯聲實相天子天子曰噫予考真宗唯多名臣

以臻盛隆汝初事我王官東宮以暨相予始卒一躬
輔我以德有勞于邦公疾在外來歸自洛天子曰留
汝予舊學凡今在庭莫如汝舊孰以畀予唯予聖考
今旣亡矣孰爲予老何以贈之司空侍中禮則有加
予思何窮有篆其文在其碑首天子之褒史臣有詔
銘以述之永昭厥後

居士集卷第二十二終

疑以在之未部風

子思何讓直襲其文其其縣首天子之喪史引其
今預士矣據爲子未何以觀之同空卦中豈限其
如子善學其今其莫咬如善據以異子其子望其
神其以豈直襲其子其公其其收來聽自欲天子曰留
以豈直襲其子其王其東宮以豈其子故卒一

居士集卷第二十三

集二十三

碑銘二首

忠武軍節度使同中書門下平章事武恭王

公神道碑銘

并序

惟王氏之先爲常山真定人後世塋河南密而密分
入于管城遂爲鄭州管城人其封國仍世于魯惟魯
武康公事太宗皇帝秉節治戎出征入衛乃受遺詔
輔真宗有勞有勤報卹追崇以有茲魯國是生魯武
恭公公少以父任爲西頭供奉官至道二年遣五將

討李繼遷公從武康公出鐵門爲先鋒殺獲甚衆軍至烏白池諸將失期不得進公告其父曰歸師過險爭必亂乃以兵前守隘號其軍曰亂行者斬由是士卒無敢先後雖武康公亦爲之按轡追兵望其軍整不敢近武康公歎曰王氏有子矣後以御前忠佐爲軍頭巡檢邢洺男子張洪霸聚盜二州間歷年吏不能捕公以氈車載勇士爲婦人服盛飾誘之邯鄲道中賊黨爭前邀劫遂皆就擒由是知名公以將家子宿衛真宗爲內殿直殿前左班都虞候捧日左廂都

指揮使累遷英州團練使今天子即位改博州團練
使知廣信軍徙知冀州遷康州防禦使歷龍神衛捧
日天武四廂都指揮使侍衛親軍步軍馬軍殿前都
虞候步軍副都指揮使桂福二州觀察使是時章獻
太后猶臨朝有詔補一軍吏公曰補吏軍政也敢挾
詔書以干吾軍亟請罷之太后固欲與之公不奉詔
乃止及太后上僊有司請衛士坐甲公以爲故事無
爲太后喪坐甲又不奉詔於是天子知一作以公可任
大事明道二年拜檢校太保簽署樞密院事遂爲副

使明年以奉國軍留後同知院事又明年領安德軍
節度使又明年加檢校太尉宣徽南院使公爲將善
撫士而識與不識皆喜爲之稱譽其狀貌雄偉動人
雖里兒巷婦外至夷狄皆知其名氏御史中丞孔道
輔等因事以爲言乃罷公樞密拜武寧軍節度使言
者不已即以爲右千牛衛上將軍知隨州士皆爲之
懼公舉止言色如平時惟不接賓客而已久之徙知
公一作曹州而孔道輔卒客有謂公曰此害公者也公
愀然曰孔公以職言事豈害我者可惜朝廷亡一直

臣於是言者終身以爲愧而士大夫服公爲有量慶曆二年起公爲保靜軍留後知青州未行而契丹聚兵幽涿遣使者有所求自河以北皆警乃拜公保靜軍節度使知澶州契丹使者過澶州見公喜曰聞公名久矣乃得見於此邪公爲言已衰老中國多賢士大夫因指坐客歷陳其世家使者竦聽是歲徙真定府定州等路都部署改宣徽南院使判成德軍未行徙判定州兼三路都部署公治其軍無撓其私亦不貸其過居頃之士皆可用契丹使人覘其軍或勸公

執而戮之公曰吾軍整而使覘者得吾實以歸是
屈人兵以不戰也明日大閱于郊公執桴鼓誓師號
令簡明進退坐作肅然無聲乃下令曰具糗糧聽鼓
聲視吾旗所鄉契丹聞之震恐會復議和兵解徙知
陳州道過京師天子遣中貴人問公欲見否公謝曰
備邊無功幸得蒙恩徙內地不敢見明年徙河陽不
行以宣徽使奉朝請已而出判相州六年拜同中書
門下平章事判澶州明年徙鄭州封祁國公又明年
乞骸骨不許以爲會靈觀使已而復判鄭州徙澶州

除集慶軍節度使徙封冀國公皇祐三年遂以太子
太師致仕大朝會許綴中書門下班居一歲天子思
之起爲河陽三城節度使同中書門下平章事判鄭
州六年以本官爲樞密使徙封魯國公旣而上以富
公弼爲宰相是歲契丹使者來公與之射使者曰天
子以公典樞密而用富公爲相得人矣語聞上喜賜
公御弓一矢五十公善射至老不衰嘗侍上射辭曰
幸得備位大臣舉止爲天下所視臣老矣恐不能勝
弓矢上再三諭之乃手二矢再拜一發中之遂將釋

復位上固勉之再發又中由是左右皆驩呼賜以襲

衣金帶自寶元慶曆之間元昊叛河西兵出

一無久出字

無功士大夫爭進計策多所敗作公笑曰奈何紛紛

兵法不如是也使士知畏愛而怯者勇勇者不驕以

吾可勝因敵而勝之耳豈多言哉其在樞密亦嘗自

請臨邊不許凡大謀議必以咨之其在外則遣中貴

人詔問其言多見施用公自致仕復起掌樞密凡三

歲以老求去位至六七上爲之不得已以爲景靈宮

使徙忠武軍節度使又以爲同羣牧制置使五日一

朝給扶者以子若孫一人是歲公年七十有八矣明年二月辛未以疾薨于家詔輟視朝二日發哀於苑中贈太尉中書令其遺言曰臣有俸祿足以具死事不敢復累朝廷願無遣使者護喪無厚賻贈天子惻然哀其志以黃金百兩白金三千兩賜其家固辭不許以其年五月甲申塋于管城明年有詔史臣刻其墓碑臣愚以謂自國家西定河湟北通契丹罷兵不用幾四十年一日元昊叛幽燕亦犯約二邊騷動而老臣宿將無在者公於是時屹然爲中國鉅人

名將雖未嘗躬矢石攻堅摧敵而恩信已足撫士卒
名聲已足動四夷遂登朝廷典掌機密以老還仕復
起于家保有富貴享終壽考雖古之將帥及于是者
其幾何人至於出入勤勞之節與其進退綢繆君臣
之恩意可以褒勸後世如古詩書所載皆應法可書

一作紀

謹按魯武恭公諱德用字元輔曾祖諱方追封

蔣國公祖諱玄追封邢

一作邢

國公皆贈中書令父諱

超建雄軍節度使贈尚書令

一有中書令

追封魯國公謚

曰武康公娶宋氏武勝軍節度使延渥之女初爲安

定郡夫人追封榮國公夫人五男四女男曰咸熙東
頭供奉官蚤卒次曰咸融西京左藏庫使果州團練
使次曰咸庶一作度內殿崇班早卒次曰咸英供備庫
副使次曰咸康內殿承制銘曰

魯始錫封以褒武康爰暨武恭乃克有邦桓桓武恭
其容甚飭偉其名聲以動夷狄公治軍旅不寬不煩
恩均令齊千萬一人公在朝廷出守入衛乃登大臣
與國謀議公曰老矣乞臣之身帝曰休哉汝予舊臣
亟其強起秉我樞鈞禮不筋力老予敢侮公來在庭

拜毋蹈舞若子與孫助其興俯凡百有位誰其敢儔
惟時黃耆天子之優富貴之隆亦有能保孰享其終
如公壽考公有世德載勲旂常刻銘有詔俾嗣其芳

贈刑部尚書余襄公神道碑銘

并序

始興襄公旣塋于曲江之明年其子仲荀走于亳以
來告曰余氏世爲閩人五代之際逃亂于韶自曾高
以來晦迹嘉遁至于博士府君始有祿仕而襄公繼
之以大曲江僻在嶺表自始興張文獻公有聲于唐
爲賢相至公復出爲宋名臣蓋余氏徙韶歷四世始

有顯仕而曲江寂寥二百年然後再有聞人惟公位
登天臺正秩三品遂有爵土開國鄉州以繼美前哲
而爲韶人榮至於褒卹贈謚始終之寵盛矣蓋褒有
詔卹有物贈有告而謚行考功有議有狀合而誌之
以閱諸幽有銘可謂備矣惟是螭首龜趺揭于墓隧
以表見於後世而昭示其子孫者宜有辭而闕焉敢
以爲請謹按余氏韶州曲江人曾祖諱某祖諱某皆
不仕父諱某太常博士累贈太常少卿公諱靖字安
道官至朝散大夫守工部尚書集賢院學士知廣州

軍州事兼廣南東路兵馬鈐轄經略安撫使柱國始
興郡開國公食邑二千六百戶食實封二百戶治平
元年自廣朝京師六月癸亥以疾薨于金陵天子惻
然輟視朝一日賻以粟帛贈刑部尚書謚曰襄明年
七月某甲子返塋于曲江之龍歸鄉成山之原公爲
人質重剛勁而言語恂恂不見喜怒自少博學強記
至於歷代史記雜家小說陰陽律曆外暨浮屠老子
之書無所不通天聖二年舉進士爲贛縣尉書
卒改將作監丞知新建縣再遷秘書丞刊校三

集賢校理天章閣待制范公仲淹以言事觸宰相得罪諫官御史不敢言公疏論之坐貶監筠州酒稅稍徙秦州已而天子感悟亟復用范公而因之以被斥者皆召還惟公以便親乞知英州遷太常博士丁母憂服除遂還爲集賢校理同判太常禮院景祐慶曆之間天下怠於久安吏習因循多失職及趙元昊以夏叛師出久無功縣官財屈而民重困天子赫然思振頽弊以修百度既已更用二三大臣又增置諫官四員使言天下事公其一人也即改右正言供職公

感激奮勵遇事輒言無所迴避姦諛權倖屏息畏之
其補益多矣然亦不勝其怨嫉也慶曆四年元昊納
誓請和將加封冊而契丹以兵臨境上遣使言爲中
國討賊且告師期請止毋與和朝廷患之欲聽重絕
夏人而兵不得息不聽生事北邊議未決公獨以謂
中國厭兵久矣北契丹之所幸一日使吾息兵養勇
非其利也故用此以撓我爾是不可聽朝廷雖是公
言猶留夏冊不遣而假公諫議大夫以報公從十餘
騎馳出居庸關見虜於九十九泉從容坐帳中辯言

一作折 往復數十卒屈其議取其要領而還朝廷遂餐

夏冊臣元昊西師旣解嚴而北邊亦無事是歲以本
官知制誥史館修撰而契丹卒自攻元昊明年使來
告捷又以公往報坐習虜語出知吉州怨家因之中
以事左遷將作少監分司南京公怡然還鄉里闔門
謝賓客絕人事凡六年天子每思之欲用者數矣大
臣有不喜者第遷光祿少卿于家又以爲某

一本作
右領軍

衛將軍壽州兵馬鈐轄辭不拜皇祐三年祀明堂覃
恩遷衛尉卿明年知虔州丁父憂去官而蠻賊儂智

高陷邕州連破嶺南州縣圍廣州乃即廬中起公爲
秘書監知潭州即日疾馳在道改知桂州廣南西路
經略安撫使公奏曰賊在東而徙臣西非臣志也天
子嘉之即詔公經制廣東西賊盜乃趨廣州而智高
復西走邕州自智高初起交趾請出兵助討賊詔不
許公以謂智高交趾叛者宜聽出兵毋沮其善意累
疏論之不報至是公曰邕州與交趾接境今不納必
忿而反助智高乃以便宜趣交趾會兵又募儂黃諸
姓酋豪皆縻以職與之誓約使聽節制或疑其不可

用公曰使不與智高合足矣及智高入邕州遂無外
援旣而宣撫使狄青會公兵敗賊於歸仁智高走入
海邕州平公請復終喪不許諸將班師以智高尚在
請留公廣西委以後事遷給事中諫官御史列疏言
公功多而賞薄再遷尚書工部侍郎公留廣西逾年
撫緝完復嶺海肅然又遣人入特磨襲取智高母及
其弟一人俘于京師斬之拜集賢院學士久之徙知
潭州又徙青州再遷吏部侍郎嘉祐五年交趾寇邕
州殺五巡檢天子以謂恩信著於嶺外而爲交趾所

畏者公也驛召以爲廣西體量安撫使悉發荆湖兵以從公至則移檄交趾召其臣費嘉祐詰責之嘉祐皇恐對曰種落犯邊罪當死願歸

一本作留

取首惡以獻

即械五人送欽州斬于界上公還邕人遮道留之不得明年以尚書左丞知廣州英宗即位拜工部尚書代還道病卒享年六十有五公經制五管前後十年凡治六州所至有惠愛雖在兵間手不釋卷有文集二十卷奏議五卷三史刊誤四十卷娶林氏封魯郡夫人子男三人伯莊殿中丞早卒仲荀今爲屯田員

外郎叔英太常寺太祝女六人皆適士族孫

一十六有男

人孫女五人銘曰

余遷曲江仍世不顯奮自襄公有聲甚遠始興開國
襲美于前兩賢相望三百年間偉歟襄公惟邦之直
始登于朝官有言責左右獻納姦諛屏息慶曆之治
實多補益逢時有事奔走南北功書史官名在夷狄
出入艱勤險夷一德小人之纔公廢于里一方有警
公起于家威行信結嶺海幽遐公之在焉帝不南顧
胡召其還殞于中路返柩來歸韶人負土伐石刻辭

公或于來與計計說說幽與公之去與帝不南
出人與使劍夷一縣小人之難公與千里一衣
實之能益多和自事衣衣南北此書史有公衣
故登于殿自言責主衣知此姦婦是息與習之
樂美于前而賀陳望三百年間對集公對朕之直
余聖曲以對世不隱奮自與公衣範其壯故與開國
人終文正人說曰

侯明此英太書衣太跡衣大人皆與士楚終

居士集卷第二十四

集二十四

墓表八首

石曼卿墓表

曼卿諱延年姓石氏其上世爲幽州人幽州入于契

丹其祖自成始以其族間走南歸天子嘉

一作喜

其來

將祿之不可乃家于宋州之宋城父諱補之官至太

常博士幽燕俗勁武而曼卿少亦以氣自豪讀書不

治章句獨慕古人奇節偉行非常之功視世俗屑屑

無足動其意者自顧不合於世乃一混以

一作于

酒然

好劇飲大醉頽然自放由是益與時不合而人之從其遊者皆知愛曼卿落落可竒而不知其才之有以用也年四十八康定二年二月四日以太子中允秘

閣校理卒于京師曼卿少舉進士不中

一有第字

真宗推

恩三舉進士皆補奉職曼卿初不肯就張文節公素竒之謂曰母老乃擇祿耶曼卿矍然起就之遷殿直久之改太常寺太祝知濟州金鄉縣歎曰此亦可以爲政也縣有治聲

一有用薦者三字

通判乾寧軍丁母永安

縣君李氏憂服除通判永靜軍皆有能名充館閣校

勘累遷大理寺丞通判海州還爲校理莊獻明肅有

皇字

太后臨朝曼卿上書請還政天子其後太后崩范

諷以言見幸引嘗言太后事者遽得顯官欲引曼卿

曼卿固止之乃已自契丹通中國德明盡有河南而

臣屬遂務休兵養息天下然內外弛武三十餘年曼

卿上書言十事不報已而元昊反西方用兵始思其

言召見稍用其說籍河北一無二字河東陝西之民得鄉

兵數十萬曼卿奉使籍兵河東還稱旨賜緋衣銀魚

天子方思盡其才而且病矣既而聞邊將有欲以鄉

兵扞賊者笑曰此得吾粗也夫不教之兵勇怯相雜
若怯者見敵而動則勇者亦牽而潰矣今或不暇教
不若募其敢行者一有用字則人人皆勝兵也其視世事

蔑若不足爲及聽其施設之方雖精思深慮不能過
也狀貌偉然喜酒自豪若不可繩以法度退而質其

平生趣

一作取

舍大節無一悖于理者遇人無賢愚皆

盡忻歡

一作歡忻

及間而可否天下是非善惡當其意者

無幾人其爲文章勁健稱其意氣有子濟滋天子聞
其喪官其一子使祿其家既卒之三十七日塋于太

清之先塋其友歐陽修表於其墓曰

嗚呼曼卿寧自混以爲高不少屈以合世可謂自重之士矣士之所負者愈太則其自顧也愈重自顧愈重則其合愈難然欲與共大事立奇功非得一無難得合自重之士不可爲也古之魁雄之人未始不負高世之志故寧或毀身污迹卒困於無聞或老且死而幸一遇猶克少施於世若曼卿者非徒與世難合而不克所施亦其不幸不得至乎中壽其命也夫其可哀也夫

尚書屯田員外郎李君墓表

漢水東至乾德匯而南民居其衝水悍暴而岸善崩
然其民尤富完其下南山一作山南之材治室屋聚居蓋
數千家皆安然易漢而自若者以有石隄爲可恃也
景祐五年余始爲其縣令旣行漢上臨石隄問其長
老皆曰吾李君之作也於是喟然而歎求李君者得
其孫厚厚舉進士好學能自言其世云李氏貝州清
河人君舉進士中淳化三年乙科鎮州真定主簿齊
化基爲吏以強察自喜惡君廉直不爲屈多求事可

釀爲罪者責君理之君辨愈明不可污卒服其能反

薦之遷威虜軍判官秩滿一無二字河北轉運使又薦爲

冀州軍事判官逾年一無二字吏部考一無此字籍凡四較考

者外皆召還公考當召是時契丹侵邊冀州獨乞留

君督軍餉課爲最多遷大理寺丞乘傳治一作理壁州

疑獄旣還轉運使又請通判冀州督旁七縣軍餉課

尤多而民不勞遭歲飢悉出庾粟以貸民且曰凶豐

甚必復使豐而歸諸庾是化吾朽積而爲新乃兩利

也轉運使以爲然因請君益貸貝魏滄冀諸州後歲

果豐飢民德君粟歸諸庾無後者蓋賴而活者數十

萬家

一本有居三年

轉運使上冀人言乞留許留一歲就拜

殿中丞歲滿將去冀民夜私入其府塹其居若不可

出君諭之乃得去通判河南

一有府字

未行契丹兵指邢

洺天子擇吏之能者改君通判邢州其守

一無二字趙守

一當守邢以扞寇辭不任邢事天子曰李某佐汝可

無患守一至邢悉以州事任君御史中丞王嗣宗辟

推直官遂薦爲御史以疾不拜求知光化軍作所謂

石隄者孫何薦其材拜三司戶部判官改知建州管

以疾辭又求知漢陽軍居三歲而漢陽之獄空者二

歲卒以疾解退居于漢旁大中祥符六年五月某日

卒于家遂塋縣東遵教鄉之友于村子孫因留家焉

君諱仲芳字秀之享年五十有三一作二官至尚書屯

田員外即君爲人敦敏而材以疾中止一有善不享其厚用不既

其能余聞古之有德於民者歿則鄉人祭於其社今民

既不能祠君于一作於漢之一無之字旁而其墓幸在其縣

余今也又不表以示民嗚呼其何以章乃德俾其孫

刻石于隧以永君之揚一作賜

內殿崇班薛君墓表

公諱塾字宗道姓薛氏資政殿學士兵部尚書簡肅
公之弟薛之世德終始有簡肅公之誌與碑公官至
內殿崇班以其年某月某日卒官于蜀州其子仲孺
以其喪歸塋于絳州之正平先塋而來乞銘以誌予
幸嘗紀次簡肅公之德而又得銘公其銘曰公躬直
清官以材稱惟賢是似不愧其兄旣塋而仲孺又來
請曰銘之藏誠一作者以永吾先君于不朽然不若錫
于隧以表見于世之昭昭也予惟薛氏於絳爲著姓

簡肅公於公爲兄弟而公之世德予旣見之銘而其
子又欲碣以昭顯于世可謂孝矣然予考古所謂賢
人君子功臣烈士之所以銘見于後世者其言簡而
著及後世衰言者自疑於不信始繁其文而猶患於
不章又備其行事惟恐不爲世之信也若薛氏之著
于絳簡肅公之信于天下而予之銘公不愧於其兄
則公之銘不待繁言而信也然其行事終始予亦不
敢略而誌諸墓矣今之碣者無以加焉則取其可以
簡而著者書之以慰其子之孝思而信于絳之人云

連處士墓表

連處士應山人也以一布衣終于家而應山之人至今思之其長老教其子弟所以孝友恭謹禮讓而溫仁必以處士爲法曰爲人如連公足矣其矜寡孤獨凶荒饑饉之人皆曰自連公亡使吾無所告依而生以爲恨嗚呼處士居應山非有政令恩威以親其人而能使人如此其所謂行之以躬不言而信者歟處士諱舜賓字輔之其先閩人自其祖光裕嘗爲應山令後爲磁郢二州推官卒而反葬應山遂家焉處士

少舉毛詩一不中而其父正以疾廢于家處士供養
左右十餘年因不復仕進父卒家故多貲悉散以賙
鄉里而教其二子以學曰此吾貲也歲饑出穀萬斛
以糶而市穀之價卒不能增及旁近縣之民皆賴之
盜有竊其牛者官爲捕之甚急盜窮以牛自歸處士
爲之媿謝曰煩爾送牛厚遺以遣之嘗以事之信陽
遇盜於西關左右告以處士盜曰此長者不可犯也
捨之而去處士有弟居雲夢徃省之得疾而卒以其
柩歸應山應山之人去縣數十里迎哭爭負其柩以

還過縣市市人皆哭爲之罷市三日曰當爲連公作

當與處士行喪處士生四子曰庶庠庸膺其二子教以學

者後皆舉進士及第今庶爲壽春令庠爲宜城令處

士以天聖八年十二月某日卒慶曆二年某月日葬

于安陸蔽山之陽自卒至今二十年應山之長老識

處士者與其縣人嘗賴以爲生者徃徃尚皆在其子

弟後生聞處士之風者尚未遠使更三四世至于孫

曾其所傳聞有時而失則懼應山之人不復能知處

士之詳也乃表其墓以告于後人

一作云

八年閏正月

一日廬陵歐陽修述

尚書屯田員外郎張君墓表

君諱谷字應之世爲開封尉氏人曾祖節祖遇皆不仕父炳爲鄭州原武縣主簿因留家焉今爲原武人也君舉進士及第爲河陽河南主簿蘇州觀察推官開封府士曹叅軍遷著作佐郎知陽武縣通判眉州累遷屯田員外郎復知陽武縣以疾致仕卒于家享年五十有九君爲人剛介一作毅好學問事父母孝與朋友信其爲吏潔廉所至有能稱其在河南時予爲

西京留守推官與謝希深尹師魯同在一府其所與
游雖他掾屬賓客多材賢少壯馳騁於一時而君居
其間年尚少獨苦羸病肺唾血者已十餘年幸其疾
少間輒亦從諸君飲酒諸君愛一作惜而止之君曰我
豈久生者邪雖他人視君亦若不能勝朝夕者其後
同府之人皆解去而希深師魯與當時少壯馳騁者
喪其十八九而君癯然唾血如故後二十年始以疾
卒君雖病羸而力自爲善居官爲吏未嘗廢學問多
爲賢士大夫所知乃知夫康強者不可恃以久而羸

弱者未必不能生雖其遲速長短相去幾何而疆者
不自勉或死而泯滅於無聞弱者能自力則必有稱
於後世君其是已君嘗謂予曰吾旦暮人耳無所取
於世也尚何區區於仕哉然吾常哀祿之及於親者
薄若幸得不死而官登于朝冀竊國家褒贈之寵以
榮其親然後歸病于原武之廬足矣乃益買田治室
於原武以待君自河南蘇州累爲名公卿所薦乃遷
著作爲郎官贈其父太子中允一作舍母宋氏京兆一作
司氏縣太君於是遂致仕歸于原武營其德政鄉之
永安

張固村原將塋其親卜以皇祐五年十一月某日用
事前四日君亦卒遂以某日從塋于原上予與君遊
久記其昔所謂予者且哀君之賢而不幸又嘉君之
志信而有成於其塋也不及銘乃表於其墓君娶祝
竹一作氏封華陽縣君有子曰損試將作監主簿至和
二年三月七日翰林學士尚書吏部郎中知制誥充
史館修撰歐陽修撰

龍武將軍薛君墓表

薛姓居河東者自唐以來族最盛宋興百年而薛姓

五顯資政殿學士尚書戶部侍郎贈兵部尚書簡肅
公當天聖中叅輔大政以亮直剛毅爲時名臣公絳
州正平人也有子直孺早卒無後以其弟之子仲孺
爲後然其兄弟五人及其諸子皆用公廕祿仕以忠
厚孝謹多材能爲緯大族君諱某字某簡肅公之兄
也少有高節仕而不得志退老于家以德行文學爲
鄉善人君少好學工爲文辭應有司格旣而曰是豈
足學也哉乃棄而不爲其後簡肅公貴顯以恩例補
君右班殿直君篤愛其弟不得已爲強起就職居頃

之卒棄去遂不復仕君居鄉里孝悌於其家忠信於其朋友禮讓於其長老鄉里之人始而愛久而化既歿而猶思焉君以天聖二年十一月某日以疾卒于家享年六十有九以某年某月某日葬于正平縣清原鄉之周村原曾祖景贈太保祖溫瑜贈太傅父光化贈太師母曰鄭國夫人費氏子男二人長曰長孺今爲尚書虞部員外郎知絳州軍州事次曰良孺殿中丞女三人君以子恩累贈右龍武軍將軍夫人鄭氏正平縣太君君卒之若干年其子始以尚書郎來

守是州予薛氏壻也且嘉君之隱德以終而有後乃
爲表于其墓既又作詩以遺之曰

伊絳之人其出如雲往于周原從我邦君周原有墓
鬱鬱其松絳無居人惟邦君是從來以春秋執事必
躬邦君在絳禮我耆艾惟父之執其恭敢怠邦君有
政惠我後生從民上冢閭里之榮嗟我絳人孝慈友
悌爲善有後惟邦君是視

永春縣令歐君墓表

君諱慶字貽孫姓歐氏其上世爲韶州曲江人後徙

均州之鄖鄉又徙襄州之穀城乾德二年分穀城之
陰城鎮爲乾德縣建光化軍歐氏遂爲乾德人修嘗
爲其縣令問其故老鄉閭之賢者皆曰有三人焉其
一人曰太傅贈太師中書令鄧文懿公其一人曰尚
書屯田郎中戴國忠其一人曰歐君也三人者學問
出處未嘗一日不同其忠信篤於朋友孝悌稱於宗
族禮義達于一作鄉閭乾德之人初未識學者見此
三人皆尊禮而愛親之旣而皆以進士舉于鄉里無
而君獨黜于有司後二十年始以同三禮出身爲

里字

潭州湘潭主簿陳州司法叅軍監考城酒稅遷彭州
軍事推官知泉州永春縣事而鄧公已貴顯于朝君
尚爲州縣吏所至上官多鄧公故舊君絕口不復道
前事至終其去不知君爲鄧公友也君爲吏廉貧宗
族之孤幼者皆養于家居鄉里有訟者多就君決曲
直得一言遂不復爭人至于今傳之嗟夫三人之爲
道無所不同至其窮達何其異也而三人者未嘗有
動於其心雖乾德之人稱三人者亦不以貴賤爲異
則其幸不幸豈足爲三人者道哉然而達者昭顯于

一時而窮者泯沒於無述則爲善者何以勸而後世
之來者何以考德於其先故表其墓以示其子孫君
有子世英爲鄧城縣令世勛舉進士君以天聖七年
卒享年六十有四塋乾德之西北廣節山之原

一作云字

河南府司錄張君墓表

一作碣

故大理寺丞河南府司錄張君諱汝士字堯夫開封
襄邑人也明道二年八月壬寅以疾卒于官享年三
十有七卒之七日塋洛陽北邙山下其友人河南尹
師魯誌其墓而廬陵歐陽修爲之銘以其塋之速也

不能刻石乃得金谷古塋命太原王顧以丹爲隸書

納于

一作於

壙中嘉祐二年某月某日其子吉甫山甫

改塋君于伊闕之教忠鄉積慶里君之始塋北邙也
吉甫纔數歲而山甫始生余及送者相與臨穴視窆
且封哭而去今年春余主試天下貢士而山甫以進
士試禮部乃來告以將改塋其先君因出銘以示余
蓋君之卒距今二十有五年矣初天聖明道之間錢
文僖公守河南公王家子特以文學仕至貴顯所至
多招集文士而河南吏屬適皆當時賢材知名士故

其幕府號爲天下之盛君其一人也文僖公善待士

未嘗責以吏職而河南又多名

一無名字

山水竹林

一作葱竹

茂樹奇花恠石其平臺清池上下荒墟草莽之間余

得日從賢人長者賦詩飲酒以爲樂而君爲人靜默

修潔常坐府治事省文書尤盡心於獄訟初以辟爲

其府推官

一作察推

既罷又辟司錄河南人多賴之而守

尹屢薦其材君亦工書喜爲詩間則從余遊其語言

簡而有意飲酒終日不亂雖醉未嘗頽墮與之居者

不服其德故師魯誌之曰飭身臨事余嘗愧堯夫

堯夫不余愧也始君之塋皆以其地不善又塋速有

其禮不備君夫人崔氏有賢行能教其子而二子孝

謹克自樹立卒能改塋君如吉卜君其可謂有後矣
自君卒後文僖公得罪貶死漢東吏屬亦各引去今
師魯死且十餘年王顧者死亦六七年矣其送君而
臨穴者及與君同府而遊者十蓋八九死矣其幸而
在者不老則病且衰如予是也嗚呼盛衰生死之際
未始不如是是豈足道哉惟爲善者能有後而託於
文字者可以無窮故於其改塋也書以遺其子俾碣

于墓且以寫余之思焉吉甫今爲大理寺丞知緱氏
縣山甫始以進士賜出身云翰林學士右諫議大夫
史館修撰歐陽修撰

細穴昔父與吾同而逝昔十歲八代張矣其年而
爾曾孫且十餘年王簡昔張衣六十半矣其逝昔而
自茲卒逝文勤公爵罪頃張數東夷疆衣各侍去今
墓衣自樹立卒計以墓衣衣吉小吾其何所不終矣
其終不計吾夫人壽九月其計始終其年而二十其
其夫下余則少欲吾之墓衣以其出不善又墓衣一

居士集卷第二十五

集二十五

墓表六首

尚書屯田員外郎贈兵部員外郎錢君墓表
君諱治字良範姓錢氏世爲彭城人後徙吳興自君
之七世祖寶又徙常州之武進曾祖諱某祖諱某父
諱某當唐末五代錢氏起餘杭據浙東西爲吳越王
於是時常州或屬江南或屬吳越而武進錢氏獨不
顯方以儒學廉讓行于鄉里連三世不仕宋興取江
南常州歸于有司君始以州進士舉中景德二年甲

科試祕書省校書郎爲揚州廣陵潮州海陽縣令遷
寧國軍節度推官監黃州麻城茶場遂知縣事遷著
作佐郎知蘄州蘄水懷安軍金堂縣又遷祕書丞知
泰州如臯縣再遷屯田員外郎通判宣州未行明道
二年六月十一日以疾卒于家享年五十有二君少
好學能爲文辭家貧其母賢嘗躬織紵以資其學問
每夜讀書一有不母爲滅燭止之君陽卧母且睡輒

復起讀

一有年二
十三字

州舉進士第一試禮部高第遂中

甲科爲吏長於決獄歷六縣皆有能政潮州自五代

時劉氏暴殘其民君爲海陽經年民歸業者千餘戶
由是海陽升爲大縣潮之大姓某氏火迹其來自某
家吏捕訊之某家號冤不服太守刁湛曰獄非錢君
不可君問大姓得火所發牀足驗之疑里仇家物因
率吏入仇家取牀折足合之皆是仇人即服曰火自
我出然故遺其迹某家者欲自免也某家誠冤君即
日出某家獄致仇人以法舉州稱爲一無此字神明其佐
宣州數決大獄及旁近郡獄有疑者皆歸決於君工
部侍郎凌策知宣州尤稱君文學曰吏事不足汚子

當以文章居臺閣欲薦其文未及而策卒初宣州官
歲市茶于涇縣命君王之策子不肖以惡茶數千斤
入于官君立焚之以白策策益以此知君策卒君歎
曰世無知我者矣在麻城以茶課歲增五倍遂遷著
作金堂故多盜君以伍保籍民察其出入凡爲盜者
許其徒告以贖罪盜遂止會甘露降其縣明年麥禾
大稔麥一莖五岐禾一莖五穗者縣人以爲君政所
致謂之錢公三瑞君歎曰吾知治民爾瑞豈吾致哉
縣人爲君立生祠如皐民不農桑以鹽爲生君曰使

民足以衣食鹽猶農也乃悉求鹽利害爲條目民便其利而鹽最增積以石數者至四十五萬君在如臯時年五十或歎其仕不達君曰使吾政行於民是達也蔡文忠公爲御史中丞數欲引君爲御史會君卒君平生所爲文章三百餘篇號曰晦書君之皇考贈殿中丞母諸葛氏封萬年縣太君從封福昌娶蔣氏初封樂安縣君又封福清子男五人曰公餗公瑾公輔公儀公佐蔣氏有賢行自君之卒日以君所爲勗其五子以學蔣氏後君二十年以卒卒時公瑾公輔

皆以進士及第公瑾爲新鄭尉公輔以文章知名當
世爲太常丞集賢校理錢氏自其祖寶徙武進其居
與塋皆在其縣之遵教鄉敦行里慶曆三一作二年九

月庚申公餗等塋君于其居之東北原皇里水之北

至和二年三月壬午

一無上八字

以蔣夫人從歐陽修曰

錢姓出陸終蓋顓頊之苗裔始以士爲周官久而以
爲姓自三代以來無甚顯者至唐末錢氏多居東南
及鏐乘亂世起餘杭有地十三州號兼吳越而王者
幾百年而武進錢氏獨以隱德累世不顯豈以力者

如彼而以德者如此哉豈其盛衰遲速之理固有不
同哉武進之錢自寶七世至君有聞又有賢子不墜
益彰其勢孰止蓋恃力者雖盛而必衰以德者愈遲
而終顯立石刻辭其示彌遠

太常博士周君墓表

有篤行君子曰周君者孝於其親友於其兄弟居父
母喪與其兄某弟某居于倚廬不飲酒食肉者三年
其言必戚其哭必哀除喪而癯然不能勝人事者蓋
久而後復自孔子在魯而魯人不能行三年之喪其

弟子疑以爲問則非魯而他國可知也孔子歿而其
後世又可知也今世之人知事其親者多矣或居喪
而不哀者有矣生能事而死能哀或不知喪禮者有
矣或知禮而以謂喪主於哀而已不必合於禮者有
矣如周君者事生盡孝居喪盡哀而以禮者也禮之
失久矣喪禮尤廢也今之居喪者惟仕宦婚嫁聽樂
不爲此特法令之所禁爾其衰麻之數哭泣之節居
處之別飲食之變皆莫知夫有禮也在上位者不以
身率其下在下者無所望於其上其遂廢矣乎故吾

於周君有所取也君諱堯卿字子俞道州永明縣人
也天聖二年舉進士累官至太常博士歷連一作衡

二州司理參軍桂州司錄知高安寧化二縣通判饒
州未行以慶曆五年六月朔日卒于朝集之舍享年
五十有一皇祐五年某月日塋于道州永明縣之紫
微岡曾祖諱某祖諱某父諱某贈某官母唐氏封某
縣太君娶某氏封某縣君君學長於毛鄭詩左氏春
秋家貧不事生產喜聚書居官祿雖薄常分俸以贖
宗族朋友人有慢已者必厚爲禮以愧之其爲吏所

居皆有能政有文集二十卷君有子七人曰諭鼎州
司理參軍曰詵湖州歸安主簿曰謐曰諷曰諲曰說
曰誼皆未仕嗚呼孝非一家之行也所以移於事君
而忠仁於宗族而睦交於朋友而信始於一鄉推之
四海表于金石示之後世而勸考君之所施者無不
可以書也豈獨俾其子孫之不隕也哉

右班殿直贈右羽林軍將軍唐君墓表

嘉祐四年冬天子既受祫享之福推恩羣臣並進爵
秩既又以及其親若在若亡無有中外遠邇於是天

章閣待制尚書戶部員外郎唐君得贈其皇考驍衛

府君爲右羽林軍

一無軍字

將軍府君諱拱字某

一無其字

其

先晉原人後徙爲錢塘人曾祖諱休復唐天復中舉

明經爲建威

一作武

軍節度推官祖諱仁恭仕吳越王

爲唐山縣令累贈諫議大夫父諱謂官至尚書職方

郎中累贈禮部尚書府君以父廕補太廟齋郎改三

班借職再遷

一作轉

右班殿直監舒州孔城鎮澧州酒

稅巡檢泰州鹽場漳州兵馬監押乾興元年七月某

日以疾卒于官享年四十有六府君孝弟於其家信

義於其朋友廉讓於其鄉里其居於官名公鉅人皆以爲材而未及用也享年不永君子哀之有子曰介字子方舉進士皇祐中嘗爲御史以言事切直貶春州別駕當是時子方之風悚動天下已而天子感悟貶未至而復用之今列侍從居諫官自子方爲祕書丞始贈府君爲太子右清道率府率其爲尚書主客員外郎殿中侍御史裏行又贈府君爲右監門衛將軍其爲尚書工部員外郎直集賢院權開封府判官又贈府君爲右屯衛將軍其遷戶部員外郎河東轉

運使又贈府君爲驍衛將軍蓋自登于朝以至榮顯
遇天子有事于天地宗廟推恩必及焉府君初娶博
陵崔氏贈仙游縣太君後娶崔氏贈清河縣太君皆
衛尉卿仁冀之女生一男介也五女長適太子中舍
盧圭次適歐陽昊早卒次適橫州推官高定次適進
士陸平仲次適著作佐郎陳起慶曆三年八月某日
以府君及二夫人之喪合塋于江陵龍山之東原後
十有七年廬陵歐陽修乃表於其墓曰嗚呼余於此
見朝廷所以褒寵勸勵臣子之意豈不厚哉又以見

士之爲善者雖堙沒幽鬱其潛德隱行必有時而發而遲速顯晦在其子孫然則爲人之子者其可不自勉哉蓋古之爲子者祿不逮養則無以及其親矣今之爲子者有克自立則尚有榮名之寵焉其所以教人之孝者篤於古也深矣子方進用於時其所以榮其親者未知其止也姑立表以待焉

胡先生墓表

先生諱瑗字翼之姓胡氏其上世爲陵州

一作京兆

人後

爲泰州如臯

一作海陵

人先生爲人師言行而身化之使

誠明者達昏愚者勵而頑傲者革故其爲法嚴而信
爲道久而尊師道廢久矣自景祐明道以來學者有
師惟先生暨泰山孫明復石守道三人而先生之徒
最盛其在湖州之學弟子去來常數百人各以其經
轉相傳授其教學之法最備行之數年東南之士莫
不以仁義禮樂爲學慶曆四年天子開天章閣與大
臣講天下事始慨然詔州縣皆立學於是建太學於
京師而有司請下湖州取先生之法以爲太學法至
今爲著令後十餘年先生始來居太學學者自遠而

至太學不能容取旁官署

一作字

以爲學舍禮部貢舉

歲所得士先生弟子十常居四五其高第者知名當

時或取

一作中

甲科居顯仕其餘散在四方隨其人賢

愚皆循循雅飭其言談舉止遇之

一無二字

不問可知爲

先生弟子其學者相語稱先生不問可知爲胡公也

先生初以白衣見天子論樂拜

一有試字

祕書省校書郎

辟丹州軍事推官改密州觀察推官丁父憂去職服

除爲保寧軍節度推官遂居湖學召爲諸王宮教授

以疾免已而以太子中舍致仕遷殿中丞於家皇祐

中驛召至京師議樂復以爲大理評事兼大常寺主簿又以疾辭歲餘爲光祿寺丞國子監直講廼居太學遷大理寺丞賜緋衣銀魚嘉祐元年遷太子中允充天章閣侍講仍居太學已而病不能朝天子數遣使者存問又以太常博士致仕東歸之日太學之諸生與朝廷賢士大夫送之東門執弟子禮路人嗟歎以爲榮以四年六月六日卒于杭州享年六十有七以明年十月五日塋于烏程何山之原其世次官邑與其行事莆陽蔡君謨具一作旦誌于幽堂嗚呼先生

之德在乎人不待表而見於後世然非此無以慰學者之思乃揭于其墓之原六年八月三日廬陵歐陽修述

瀧岡阡表

嗚呼惟我皇考崇公卜吉于瀧岡之六十年其子修始克表於其阡非敢緩也蓋有待也修不幸生四歲而孤太夫人守節自誓居窮一作貧自力於衣食以長

以教俾至于成人太夫人告之曰汝父爲吏廉而好施與喜賓客其俸祿雖薄常不使有餘曰毋以是爲

我累故其亡也無一瓦之覆一壠之植

作本以

庇而

爲生吾何恃而能自守邪吾於汝父知其一二以有
待於汝也自吾爲汝家婦不及事吾姑然知汝父之
能養也汝孤而幼吾不能知汝之必有立然知汝父
之必將有後也吾之始歸也汝父免於母喪方逾年
歲時祭祀則必涕泣曰祭而豐不如養之薄也間御
酒食則又涕泣曰昔常

一作吾

不足而今有餘其何及

也吾始一二見之以爲新免於喪適然耳既而其後
常然至其終身未嘗不然吾雖不及事姑而以此知

汝父之能養也。汝父為吏，嘗夜燭治官書，屢廢而歎。

吾問之，則曰：「此死獄也。我求其生，不得而。」吾曰：「生可

求乎？」曰：「求其生而不得，則死者與我皆無恨也。」一無也字

矧求而有得邪？以其有一本有字得，則知不求而死

者有恨也。夫常求其生，猶失之死，而世一作常求其

死也。回顧乳者一作汝而立于旁，因指而歎曰：「術

者謂我歲行在戌，將死，使其言然，吾不及見兒之立

也。後當以我語告之。其平居教他子弟，常用此語，吾

耳熟焉。故能詳也。其施於外事，吾不能知。其居于家，

無所矜飾而所爲如此是真發於中者邪嗚呼其心
厚於仁者邪此吾知汝父之必將有後也汝其勉之
夫養不必豐要於孝利雖不得博於物要其心之厚
於仁吾不能教汝此汝父之志也修泣而志之不敢
忘先公少孤力學咸平三年進士及第爲道州判官
泗綿二州推官又爲泰州判官享年五十有九塋沙
溪之瀧岡太夫人姓鄭氏考諱德儀世爲江南名族
太夫人恭儉仁愛而有禮初封福昌縣太君進封樂
安安康彭城三郡太君自其家少微一作賤時治其家

以儉約其後常不使過之曰吾兒不能苟合於世儉
薄所以居患難也其後修貶夷陵太夫人言笑自若
曰汝家故貧賤也

碑本無
六字

吾處之有素矣汝能安之

吾亦安矣自先公之亡二十年修始得祿而養又十

有二年列官于朝始得贈封其親又十年修爲龍圖

閣直學士尚書

一無尚
書字

吏部郎中留守南京太夫人

以疾終

一作
卒

于官舍享年七十有二又八年修以非

才入副樞密遂參政事又七年而罷自登二府天子

推恩褒其三世故

一作
益

自嘉祐以來逢國大慶必加

寵錫皇曾祖府君累贈金紫光祿大夫太師中書令
曾祖妣累封楚國太夫人皇祖府君累贈金紫光祿
大夫太師中書令兼尚書令祖妣累封吳國太夫人
皇考崇公累贈金紫光祿大夫太師中書令兼尚書
令皇妣累封越國太夫人今上初郊皇考賜爵爲崇
國公太夫人進號魏一作韓國於是小子修泣而言曰
嗚呼爲善無不報而遲速有時此理之常也惟我祖
考積善成德宜享其隆雖不克有於其躬而賜爵受
封顯榮褒大實有三朝之錫命是足以表見於後世

而庇賴其子孫矣。乃列其世譜具刻于碑。既又載我
皇考崇公之遺訓。太夫人之所以教而有待於修者。
並揭于阡。俾知夫小子修之德薄能鮮。遭世竊位而
幸全大節。不辱其先者。其來有自。熙寧三年歲次庚
戌四月辛酉朔十有五日乙亥。男推誠保德崇仁翊
戴功臣觀文殿學士。特進行兵部尚書知青州軍州
事兼管內勸農使充京東東路安撫使上柱國樂安
郡開國公食邑四千三百戶食實封一千二百戶修
表

集賢校理丁君墓表

君諱寶臣字元珍姓丁氏常州晉陵人也景祐元年
舉進士及第爲峽州軍事判官淮南節度掌書記杭
州觀察判官改太子中允知剡縣徙知端州遷太常
丞博士坐海賊儂智高陷城失守奪一官徙置黃州
久之復得太常丞監湖州酒稅又復博士知諸暨縣
編校祕閣書籍遂爲校理同知太常禮院君爲人外
和怡而內謹立望其容貌進趨知其君子人也居鄉
里以文行稱少孤與其兄篤於友悌兄亡服喪三年

曰吾不幸幼失其親兄吾父也慶曆中詔天下大興
學校東南多學者而湖杭尤盛君居杭學爲教授以
其素所學問而自修於鄉里者教其徒久而學者多
所成就其後天子患館閣職廢特置編校八員其選
甚精乃自諸暨召居祕閣君治州縣聽決精明賦役
有法民畏信而便安之其始治剡也如此後治諸暨
剡鄰邑也其民聞其來謹曰此剡人愛而思之謂不
可復得者也今吾民乃幸而得之而君亦以治剡者
治之由是所至有聲及居閣下淡然不以勢利動其

心未嘗走謁公卿與諸學士羣居恂恂人皆愛親之
蓋其召自諸暨也以材行選及在館閣久而朝廷益
知其賢英宗每論人物屢稱之國家自削除僭僞東
南遂無事偃兵弛備者六十餘年矣而嶺外尤甚其
山海荒濶列郡數十皆爲下州朝廷命吏常以一縣
視之故其守無城其戍無兵一日智高乘不備陷邕
州殺將吏有衆萬餘人順流而下潯梧封康諸小州
所過如破竹吏民皆望而散走獨君猶率羸卒百餘
拒戰殺六七人既敗亦走初賊未至君語其下曰幸

得兵數千人伏小湘峽扼至險以擊賊可必勝也
乃請兵於廣州凡九請不報又嘗得賊帥者一人斬
之賊既平議者謂君文學宜居臺閣何從以承顧
問而眇然以一儒者守空城提百十飢羸之卒當萬
人卒至之賊可謂不幸而天子亦以謂縣官不素設
備而責守吏不以空手捍賊宜原其情故一切輕其
法而君以嘗請兵不得又能拒戰殺賊則又輕之故
他失守者皆奪兩官而君奪一官已而知其賢復召
用後十餘年御史知雜蘇宋受命之明日建言請復

治君前事奪其職而黜之天子知君賢不可以一眚
廢而先帝已察其罪而輕之矣又數更大赦且罪無
再坐然猶以御史新用故屈君使少避而不傷之也
乃用其校理歲滿所當得者即以君通判永州方待
闕於晉陵以治平四年四月某甲子暴中風眩一夕
卒享年五十有八累官至尚書司封員外郎階朝奉
郎勲上輕車都尉曾祖諱某祖諱某皆不仕父諱某
贈尚書主部侍郎母張氏初游縣太君君娶饒氏封
晉陵縣君先卒子男四人曰隅曰除曰隋皆舉進士

曰恩兒才一歲女一人適著作佐郎集賢校理胡宗
愈君既率天子憫然推恩錄其子偶爲太廟齋郎君
之平生履憂患而遭困阨處之安然未嘗見戚戚之
色其於窮達壽夭知有命固無憾於其心然知君之
賢哀其志而惜其命止於斯者不能無恨也於是相
與論著君之大節伐石紀辭以表見於後世庶幾以
慰其思焉熙寧元年六月十四日廬陵歐陽修述

居士集卷第二十五終

居士集卷第二十六

集二十六

墓誌四首

虞部員外郎尹公墓誌銘

公諱仲宣姓尹氏尹氏世居太原無顯者由公之父
贈刑部侍郎諱文化始舉毛詩登某科以材敏稱於
當世仕至尚書都官郎中於今人士語尹氏者往往
能稱其名字由是始有聞人刑部塋其父於河南今
爲河南人公舉周易咸平三年中第歷梓州銅山鳳
翔麟遊二主簿京兆府司理叅軍潞州襄垣主簿遷

汝州梁懷州武陟二令又遷蜀州軍事判官薦其能

者數十

一作十數

人拜大理寺丞太子中舍殿中丞國子

博士尚書虞部員外郎歷知汝州之葉鄭州之滎陽

一有縣字

又知大寧監通判華州又知資州皆有政

一作能

績最後知郢州至州之三日晨起衣冠得疾

一有及寢而三

字

卒實景祐四年三月七日也年七十一以五年十一

月二十八日塋壽安母鄭氏德興縣太君妻張氏壽

安縣君等七人源洙湘冲淑沂泳諸孫十餘人公既

卒許州進士朱生遊資州資人

一作州家家能道公之

遺事及聞公喪皆巷哭其吏與民各以其類之浮屠
發哀受弔朱生既得公善十餘事爲作遺愛錄以遺
資人朱生未嘗識公者而言若茲信矣嗚呼善人之
爲善也生不赫赫於當時則其遺風餘思在乎人者
必有時而著公生而爲善歿也見思一作歿也見稱
思可知也已

銘者所以名其善功以昭後世也

一有夫字銘曰

物塞而通必艱其初至于大亨乃燁而敷尹氏之先
久室不耀自公再世始發其奧公不墜德有善在人

孰當其興在子與孫

一作在予子孫

尚書兵部員外知制誥謝公墓誌銘

朝散大夫行尚書兵部員外郎知制誥知鄧州軍州
事兼管內勸農使上輕車都尉陽夏縣開國男食邑
三百戶賜紫金魚袋謝公諱絳字希深其先出於黃
帝之後任姓之別爲十族謝其一也其國在南陽宛
三代之際以微不見至詩嵩高始言周宣王使召公
營謝邑以賜申伯蓋謝先以失國其子孫散亡以國
爲姓歷秦漢魏益不顯至晉宋間謝氏出陳郡者始
爲盛族公之皇考曰太子賓客諱濤其爵陳留伯至

公開國又爲陽夏男皆在陳郡故用其封復因爲陳
郡人然其官邑卒塋隨世而遷其譜自八世而下可
見曰八代祖汾爲河南緱氏人至五代祖希圖始遷
而南或塋嘉興或塋麗水自皇考已上三代皆塋杭
州之富陽公以寶元二年四月丁卯來治鄧其年十
一月己酉以疾卒于官以遠不克歸于南即以明年
八月得州之西南某山之陽遂以塋公享年四十有
五初娶夏侯氏先卒今舉以祔後娶高氏文安縣君
三男六女男某皆將作監主簿女一早亡五尚幼公

之卒其客歐陽修弔而哭于位退則歎曰初賓客之
薨修獲銘其德納諸富陽之原今又哭公之喪哭者
在位莫如修舊蓋嘗銘其世矣乃論次其終始曰公
年十五起家試秘書省校書郎復舉進士中甲科以
奉禮郎知潁州汝陰縣遷光祿寺丞上書論四民失
業楊文公薦其材召試充秘閣校理再遷太常丞通
判常州丁母晉陵郡君許氏憂服除遷太常博士用
鄭氏經唐故事議昭武皇帝非受命祖不宜配享感
生帝天聖中天下水旱而蝗河決壞滑州又上書用

洪範五行京房傳推災異所以爲天譴告之意極陳
時所闕失無所諱與修真宗國史遷祠部員外郎直
集賢院通判河南府移書丞相言歲凶嵩山宮宜罷
勿治又上書論妖人方術士不宜出入禁中請追所
賜先生處士號歲滿權開封府判官再遷兵部員外
郎爲三司度支判官上書論法一作詔禁密花透背詔
書云自內始今內人賜衣復下有司取之是爲法而
自戾無以信天下又言後苑作官市龜筒亦禁物民
間非所有有之爲犯法因請罷內作諸器皆以其職

言又言有司多

一無此字

求上旨

一有多字

從中出而數更且

謂號令數變則虧國體利害偏聽則惑聰明請者務

欲各行而守者患於不一請凡詔令皆由中書樞密

院然後行郭皇后廢上書用詩白華引申后褒姒以

爲戒景祐元年丁父憂服除

一本賓客薨于京師以喪南歸三年

召試

知制誥判流內銓議者言李照新定樂不可用下其

議議者久不決公爲兩議曰宋樂用三世矣照之法

不合古吾從舊乃署其一議曰從新樂者異署議者

皆從公署公爲人肅然自修平居溫溫不妄喜怒及

其臨事敢言何其壯也雖或聽或否或論高而不能
行或後果如其言皆傳經據古切中時病三代已來
文章盛者稱西漢公於制誥尤得其體世所謂常楊
元白不足多也公既以文知名至於爲政無所不達
自汝陰已有能名佐常州至今常人思之錢思公守
河南悉以事屬之是時莊獻明肅太后莊懿太后起
二陵於永安至於鐵石畚鍤不取一物於民而足修
國子學教諸生自遠而至者百餘人舉而中第者十
八九河南人聞公喪皆出涕諸生畫像於學而祠之

初吏部擬官以圭田有無爲均公取州縣田覆其實
者準其方之物賈一作價差爲多少揭之省中它有名

而無實者皆不用人以爲便天下之吏有定職而無

定員故選者常患其多而久積吏緣以姦至公爲之

選而集者有不逾旬而去天下皆稱其平其遇事冗

劇

一有處字

尤若簡而有餘及求知鄧州其治益以寬靜

爲本州遂無事先時有妖僧者以僞言誘民男女數

百人往往晝夜爲會凡六七年不廢公則取其首惡

二人寘之法餘一不問民始知公法可畏而安於不

苛南陽堰引湍水溉公田水之來遠而少能及民而

堰墩

勅列反

墩破公議復召信臣故渠以罷鄧人歲役

而以水與民大興學舍皆未就而卒始公來鄧食其

廩者四十餘人或疑其多及其喪爲之制服其治衣

櫛纔二婢至三從孤弟妹皆聚而食之卒之日廩無

餘粟家無餘貲入哭其堂施無新衣然平生

一有好施宗族

喜賓客談宴怡怡如也自少而仕凡三十年間自守

不回而外亦不爲甚異此其始終大節也

一無也字下有者太

史公世稱其文善以多爲少今予不能乃不暇具書公之事而特著其大者畧書之噫公之事何多歟繁

予文而不克究使公而壽且用極其材則凡今所書
又有不暇書而又著其尤大者爾將益其嗣子其來
乞銘曰

壽吾不知命繫其偶不俾其隆安歸其咎惟德之明
惟仁之茂惟力之爲而公之有

資政殿學士尚書戶部侍郎簡肅薛公墓誌

銘

明道二年尚書禮部侍郎叅知政事河東公以疾告
歸其政天子曰吾不可以數煩公乃詔優公不朝而
使視事如故居歲中數以告乃得還第又數以告然

後拜公爲資政殿學士戶部侍郎判尚書都省罷其
政事景祐元年八月庚申公薨于家年六十有八贈
兵部尚書公諱奎字宿執姓薛氏薛氏之先出於黃
帝之後任姓任姓之別爲十族薛者奚仲之始封也
其後奚仲去遷邳而仲虺留居薛春秋之際以國見
經而其子孫後以爲氏此其譜也隋唐之間薛姓居
河東者爲最盛公絳州正平人也曾王父贈太保諱
某大王父贈太傅諱某王父殿中丞贈太師諱某三
世皆不顯而以公貴初太宗皇帝伐并州太師以策

千行在不見用罷公生十餘歲已能屬文辭太師顧
曰是必大吾門吾復何爲乃不復事生業務施貸以
賙鄉閭曰吾有子矣後何患後五十年公始佐今天
子叅政事爲世名臣如其言公爲人敦篤忠烈果敢
明達初舉進士爲州第一讓其里人王巖而居其次
於是鄉里皆稱之淳化三年再舉乃中授秘書省校
書郎隰州軍事推官始至取州獄已成書活寃者四
人徙儀州推官士爭薦其能丁太夫人憂服除用薦
者拜大理寺丞知興化軍莆田縣悉除故時王氏無

名租莆田人至今以爲德遷殿中丞知河南長水縣徙知興州州舊鑄鐵錢用功多人以爲苦公乃募民有力者弛其山使自爲利而收其鐵租以鑄悉罷役者人用不勞遷太常博士御史中丞向敏中薦公材中御史就拜監察御史召爲殿中侍御史判三司都磨勘司賜緋衣銀魚出爲陝西轉運副使坐舉人免官居數月通判陝府歲餘召還臺安撫河北稱旨改尚書戶部員外郎淮南轉運使江淮制置發運使開揚州河廢其三堰以便漕船歲以八百萬石食京師

其後罕及其多轉吏部員外郎丁太師憂去職不許
居二歲入爲三司戶部副使與三司使李士衡爭事
省中士衡扳時權貴人爲助公拜戶部郎中直昭文
館出知延州遷吏部郎中入爲龍圖閣待制知開封
府遷右諫議大夫御史中丞契丹使蕭從順來朝是
時莊獻明肅太后垂簾聽政從順舉止多不遜以謂
南使至契丹者皆見太后遂請見之朝議患之未有
以決公獨以理折之從順乃止而嫉公者讒其漏禁
中語由是拜集賢院學士出知并州改知秦州秦州

宿重兵兵嘗慊食公爲勤儉積畜教民水種歲中遷
樞密直學士知益州而秦之餘粟積者三百萬征筭
之衍者三十萬覈民舊隱田數百頃所得芻粟又十
餘萬秦州之民與其蕃一作夷落數千人詣轉運使請

留不果公在開封以嚴爲治肅清京師京師之民至

私以俚語目公且相戒曰是不可犯也囹圄爲之數

空而至今之人猶或目之及居蜀尤有善政民有得

僞蜀時中書印者夜以錦囊掛之西門門一作閤者以

白蜀人隨之者萬計皆恂恂一作詢詢出異語且觀公所

爲公顧主吏藏之畧不取視民乃止老嫗告其子不
孝者子訴貧不能養公取俸錢與之曰用此爲生以
養母子遂相慈孝里富人三女皆孤民或妄爭其產
公析其貲爲三爲嫁其女於是人皆以公爲仁恩蜀
人喜亂而易搖公既鎮以無事又能順其風俗從容
宴樂及其臨事破姦發伏逆見隨決如逢蒙之射而
方朔之占無一不中蜀人一作甚後愛且畏之以比張尚
書詠而不苛開封天子之畿益州蜀一都會皆世號
尤難理者而公尤有名其猛寬之政前後異施可謂

知其方矣入拜龍圖閣直學士權三司使遂拜叅知政事公入謝上曰先帝嘗言卿可用吾今用卿矣公益感激自勵而素剛毅守節不苟合既與政尤挺立無所牽隨然遂欲繩天下無細大一入於規矩徃徃不可其意則歸卧于家歎息憂愧輒不食家人笑其何必若此公曰吾慚不及古人而懼後世譏我也公嘗使契丹與其君臣語而以論議服其坐中其後契丹使來必問公所在及聞已用乃皆喜曰是得人矣邊吏得諜者言契丹欲弃約舉兵上亟召大臣議或

欲選將增兵公曰契丹畏誓而貪利且無隙以開其
端其必不動不宜失持重之勢而使其可窺已而卒
無事他日上顧公曰果如公言於是益重之明道二
年莊獻明肅太后欲以天子衮冕見太廟臣下依違
不決公獨爭之曰太后必若王服見祖宗若何而拜
乎太后不能奪爲改他服太后崩上見羣臣泣曰太
后疾不能言而猶數引其衣若有所屬何也公遽曰
其在衮冕也然服之豈可見先帝乎上大悟卒以后
服塋於是益以公爲果可用也

一無也字下有而公
不至乎大用終焉

先娶潘氏早卒後娶趙氏今封金城郡夫人子男一人直孺大理寺丞女五人長適故職方員外郎張竒其次適故開封府士曹叅軍喬易從早亡次適太原王拱辰早亡次適廬陵歐陽修次又適王氏公既貴贈其曾祖而下三室曰太保太傅太師追封曾祖妣某氏某夫人祖妣某氏某夫人妣某氏某夫人公性孝慈雖在大位家人勤儉不知爲驕奢諸子幼孤撫養不異平生所爲文章四一作二十卷直而有氣如其爲人五年某月某甲子其孤直孺奉其柩自京師塋

于絳州以某年某月某甲子即事先期狀公之功行
上之太常太常議曰謚法一德不懈曰簡執心決斷
曰肅今其狀應法乃謚曰簡肅銘曰

薛夏之封以國爲姓其後河東隋唐最盛公世載德
實河東人必大其門太師之云公之從事以難爲易
叅于大政不撓不牽屢決大議有言炳然公不爲相
告病還家贈賻之榮尚書是加公有敏德焯其行事
公有令名有司之謚事告之史謚傳子孫又刻銘章
納于墓門

贈尚書度支員外郎張君墓誌銘

君諱思字希聖青州人也曾祖諱庭實不仕祖諱昂
贈尚書職方郎中父諱從化尚書駕部員外郎贈秘
書少監母河南縣太君朱氏君天禧四年舉進士及
第爲維州司理叅軍青州益都縣主簿開封府倉曹
叅軍改秘書省著作佐郎知益都縣再遷秘書丞太
常博士通判閬州權知興元府景祐四年九月十七
日以疾卒于官享年六十有四君世以明經仕宦至
君始爲辭章舉進士官雖卑事親能盡其養不知其

祿之薄也退與妻子惡衣蔬食無難色居親喪盡哀
塋其家三十餘喪鄉里稱其孝爲吏所至有能名京
東歲大飢所在盜賊起獨君所治益都無盜而賑卹
飢人比他縣尤多安撫使以爲言詔書褒美在閬州
治嘉陵江石隄民至今賴之君爲博士時其弟愈猶
爲布衣君嘗歎曰吾年四十有七始以進士及第今
且老吾志其衰矣顧其三子曰是必大吾門因獨念
其弟愈先君之所愛也乃欲致其仕以冀一子恩得
以命其弟顧貧未能去祿仕每以爲恨已而其子唐

卿舉進士第一君聞之喜且泣曰吾志其就矣乃上書求致仕且欲官其弟愈未及而卒君娶王氏馮翊縣君後君二十二年以卒子男三人唐卿將作監丞通判陝州唐輔孟州濟源縣尉皆早卒唐民今爲秘書丞女二人長適屯田員外郎任沆次早卒孫男二人曰危行果行孫女二人皆尚幼君以子恩贈尚書度支員外郎夫人王氏亦以子恩封長壽縣太君以嘉祐四年十月十二日塋君夫人于青州益都縣仁德鄉之南原銘曰

張有世序是爲青人君治益都有政于民仕也四方
昌其子孫終必返本斯之謂仁鄉人之思封樹長存

人曰子孫其可也
書丞文二人尋齋步田員收噴到武必早卒然畏二
此映刻所書即孟悅齋所編操昔早卒書及今爲錄
細書餘書二十二年以平子畏三人書收錄於盟亦
書宋姪出且爲官其策愈未久而卒書更王刃部陳
較舉數士第一書聞之喜且出曰吾志其歸矣以土

居士集卷第二十七

集二十七

墓誌五首

翰林侍讀學士給事中梅公墓誌銘

翰林侍讀學士給事中

一云行給事中知許州上柱國南昌郡開國公食邑三千

三百戶實封六百戶賜紫金魚袋

梅公既卒之明年其孤及其兄之

子堯臣來請銘以葬曰吾叔父病且亟矣猶卧而使

我誦子之文今其葬宜得子銘以藏公之名在人耳

目五十餘年前卒一歲予始拜公於許公雖衰且

一無

此病其言談詞氣尚足動人嗟予不及見其壯也然

嘗聞長老道公咸平景德之初一遇真宗言天下事

合意遂以人主爲知己當時搢紳之士

一無此二字

望之

若不可及已而擯斥流離四十年間白首翰林卒老
一州嗟夫士果能自爲材邪惟世用不用爾故予記
公終始至於咸平景德之際尤爲詳焉良以悲其志
也公諱詢字昌言世家宣城年二十六進士及第試
校書郎利豐監判官遷將作監丞知杭州仁和縣又
遷著作佐郎舉御史臺推勘官時亦未之奇也咸平
三年與考進士於崇政殿真宗過殿廬中一見以爲

奇材召試中書直集賢院賜緋衣銀魚是時契丹數
寇河北李繼遷急攻靈州天子新即位銳於爲治公
乃上書請以朔方授潘羅支使自攻取是謂以蠻夷
攻蠻夷真宗然其言問誰可使羅支者公自請行天
子惜之不欲使蹈兵間公曰苟活靈州而罷西兵何
惜一梅詢天子壯其言因遣使羅支未至而靈州沒
于賊召還遷太常丞三司戶部判官數訪時事一有使得
以書於是屢言西北事時邊將皆守境不能出師公
論請一有大臣臨邊督戰募遊兵擊賊一有論曹瑋馬知節才可用又

十論傳潛楊瓊敗績當誅

一有以正刑三字

而田紹斌王榮

等可責其効以贖過凡數十事其言甚壯天子益器

其材數欲以知制誥宰相有言不

一作未

可者乃已其

後繼遷卒爲潘羅支所困而朝廷以兩鎮授德明德

明頓首謝罪河西平天子亦再幸澶淵

一有以金帛二字

盟

契丹而河北之兵解天下無事矣公既見疎不用初

坐斷田訟失實通判杭州徙知蘇州又徙兩浙轉運

一有副字

使還判三司開拆司遷太常博士用封禪恩遷

祠部員外郎又坐事出知濠州以刑部員外郎爲荆

湖北路轉運使坐擅給驛馬與一作人奔喪而馬死

奪一官通判襄州徙知鄂州又徙蘇州天禧元年復

爲刑部員外郎陝西轉運使靈州弃已久公與秦州

曹瑋得胡蘆河路一有無沙二字可出兵無沙行之阻而能

徑一無此八字趨靈州遂請瑋居環慶以圖出師會瑋入

爲宣徽使不克而止遷工部郎中坐朱能反貶一作左遷

懷州團練副使再貶一作改池州天聖元年拜度支員

外郎知廣德軍徙知楚州遷兵部員外郎知壽州又

知陝府六年復直集賢院又遷工部郎中改直昭文

館知荆南府召爲龍圖閣待制糾察在京刑獄判流
內銓改龍圖閣直學士知并州未行遷兵部郎中樞
密直學士以往就遷右諫議大夫入知通進銀臺司
復判流內銓改翰林侍讀學士羣牧使遷給事中知
審官院以疾出知許州康定二年六月某日卒于官
公好學有文尤一無此
五字喜爲詩爲人嚴毅修潔而材
辯敏明少能慷慨見竒真宗自初召試感激言事自
以謂君臣之遇已而失職逾二十年始復直於集賢

一作始復
直集賢院

比登侍從而門生故吏曩時所考進士或

至宰相居大官故其視時人常以先生長者自處論
事尤多發憤其在許昌繼遷之孫復以河西叛朝廷

出師西方而公已老不復言兵矣享年七十有八以

終

一無此
二字

梅氏遠出梅伯世久而譖不明公之皇曾

祖諱超皇祖諱遠皆不仕父諱邈贈刑部侍郎夫人

劉氏彭城縣君子五人長曰鼎臣官至殿中丞次曰

寶臣皆

一無
皆字

先公卒次曰得臣太子中舍次曰輔臣

前將作監丞次曰清臣大理評事公之卒天子贈賻

優恤

一無此
一字

加

一作
拜

得臣殿中丞清臣衛尉寺丞明

年八一作九月某日塋公宣州之某縣某鄉某原一作塋于

宣城縣長安

鄉西山里銘曰

士之所難有蘊無時偉歟梅公人主之知勇無不敢
惟義之為困于翼飛中垂以欬一失其塗進退而坎
理不終窮既晚而通惟其壽考福祿之隆一作終

尚書都官員外郎歐陽公墓誌銘

公諱曄字日華於檢校工部尚書諱託彭城縣君劉

氏之室為曾孫武昌縣令諱柳蘭陵夫人一作蘭陵郡無夫人

字蕭氏之室為孫贈太僕少卿諱偃追封潘原縣太

君李氏之室爲第三子於修爲叔父修不幸幼孤依
于叔父而長焉嘗奉太夫人之教曰爾欲識爾父乎
視爾叔父其狀貌起居言笑皆爾父也修雖幼已能
知太夫人言爲悲一作哀而叔父之爲親也歐陽氏世

家江南僞唐李氏時爲廬陵大族李氏亡先君昆弟
同時而仕者四人獨先君早世其後三人皆登于朝

以歿公

一有以字

咸平三年舉進士甲科歷南雄州判官

隨闋二州推官江陵府掌書記拜太子中允太常丞
博士尚書屯田都官二貲外卽享年七十有九最後

終于家以慶曆四年三月十日塋于安州應城縣高
風鄉彭樂村於其塋也其素所養兄之子修泣而書
曰嗚呼叔父之亡吾先君之昆弟無復在者矣其長
養教育之恩既不可報而至於狀貌起居言笑之可
思慕者皆不得而見焉矣惟勉而紀吾叔父之可傳
于世者庶以盡修之志焉公以太子中允監興國軍
鹽酒稅太常丞知漢州雒縣博士知端州桂陽監屯
田員外郎知黃州遷都官知永州皆有能政坐舉人
奪官復以屯田通判歙州以本官分司西京許家于

隨復遷都官于家遂致仕景祐四年四月九日卒公

爲人嚴明方質尤以潔廉自持自爲布衣非其義不

輒受人之遺少而所與親舊後或甚貴終身不造其

門其涖官臨事長於決斷初爲隨州推官治獄之難

決者三十六

一有人字

大洪山竒峯寺聚僧數百人轉運

使疑其積物多而僧爲姦利命公徃籍之

一有官爲出入四字

僧以白金千兩餽公公笑曰吾安用此然汝能聽我

言乎今歲大凶汝有積穀六七萬石能盡以輸官而

賑民則吾不籍汝僧喜曰諾飢民賴以全活陳堯咨

以豪貴自驕

一有所居爲不法五字

官屬莫敢仰視在江陵用

私錢詐爲官市黃金府吏持帖強僚佐署公呵吏曰
官市金當有文符獨不肯署堯咨雖憚而止然諷轉
運使出公不使居府中鄂州崇陽素號難治乃徙公
治之至則決滯獄百餘事縣民王明與其同母兄李
通爭產累歲明不能自理至貧爲人賃舂公折之一
言通則具伏盡取其產鉅萬一字有歸于明通退而無
怨言桂陽民有爭舟而相毆至死者獄久不決公自
臨其獄出囚坐庭中去其桎梏而飲食之食訖悉勞

而還于獄獨留一人于庭留者色動惶顧公曰殺人者汝也囚不知所以然公曰吾視食者皆以右手持匕而汝獨以左本死者傷在右肋此汝殺之明也囚即涕泣曰我殺也不敢以累他人公之臨事明辨有古良吏決獄之術多如此所居人皆愛思之公娶范氏封福昌縣君子男四人長曰宗顏次曰宗閔其二早亡女一人適張氏亦早亡銘曰

公之明足以決於事愛足以思於人仁足以施其族清足以潔其身而銘之以此足以遺其子孫

江寧府句容縣令贈尚書兵部員外郎王公

墓誌銘

代恕

王氏世家開封陳留之通許鎮咸平中分通許爲咸平縣故王氏今爲開封咸平人公諱某字某魯祖諱丕祖諱祚父諱銳世以貴雄里中不樂仕宦而好施其有以賙人之急及公而貴益衰乃歎曰吾聞施於爲政其利可以賙天下貴安足道哉乃慨然以孔氏尚書舉於有司累不中因就他選曰可以爲政何擇焉初任萊州萊陽主簿會令坐事解去公署令事告

其民曰令欲爲法簡而利民博者當何爲去其甚惡
可也乃縛故吏唐權條其宿惡上于州杖其脊而還
之縣之姦豪皆斂色屏氣指權相戒不可犯公法公
曰使我爲令暮年不獨善人不懼惡人可使惡人爲
善也已而河決東平公部縣丁夫數千召權署隊長
權喜曰公許我自新矣卒以丁夫治河爲諸縣最歷
婺州蘭溪尉陳州項城主簿會歲旱蝗州守風吏按
田者言旱不爲災公與守爭至三四民得復乃已改
潁州司法叅軍州民藥氏爲盜會赦出入里閭操弓

矢爲民害有朱氏者募客二人謀殺之法當死公曰
爲法所以輔善而禁惡也今殺良民爲惡盜報仇豈
法意邪乃狀列之朱氏得減死改華州司法遷蘇州
之吳江江寧之句容二縣令遂老于京師以其年某
月某日卒于家享年六十有九公好學善書喜賓客
務調人緩急而爲性寬靜沈默

一有及於吏事敢
於所爲不屈其字左

右丞史有不如意未嘗答責諸子問之則曰刑法豈

爲喜怒設邪公初娶趙氏永安郡太君後娶李氏陳

留郡太君子男十人二早卒女二

一作
人一一無
字卒

于家一適朱氏慶曆四年九月庚申塋于開封尉氏
蔣成鄉柏子原之新塋於其塋也長子拱璧右侍禁
次拱之左班殿直次拱德衛州獲嘉縣令次拱安右
班殿直次拱已守將作監主簿次拱式尉氏縣尉次
拱辰右諫議大夫權御史中丞次拱著歙州司戶叅
軍以中丞之貴累贈尚書兵部員外郎將塋中丞君
泣而語其伯仲曰吾家通許世有陰德于人而無興
者至吾先君不有于其躬而以貽後世小子不佞幸
得備員御史府進退大夫之後小子何有焉然懼乎

後世徒見王氏之興而不知吾世積漸之所以來者
若此其可無銘乃來求銘銘曰

公世以貲施德于人至公貲衰乃施于官有子之一
足大公門矧公多子多子多孫惟彼世德如流有源
其來者遠愈積益蕃銘昭其昧以永厥存

張子野墓誌銘

吾友張子野既亡之二年其弟充以書來請曰吾兄
之喪將以今年三月某日塋于開封不可以不銘銘
之莫如子宜嗚呼予雖不能銘然樂道天下之善以

傳焉况若吾子野者非獨其善可銘又有平生之舊
朋友之恩與其可哀者皆宜見於予文宜其來請於
予也初天聖九年予爲西京留守推官是時陳郡謝
希深南陽張堯夫與吾子野尚皆無恙於時一府之
士皆魁傑賢豪日相往來飲酒歌呼上下角逐爭相
先後以爲笑樂而堯夫子野退然其間不動聲氣衆
皆指爲長者予時尚少心壯志得以爲洛陽東西之
衝賢豪所聚者多爲適然耳其後去洛來京師南走
夷陵並江漢其行萬三四千里山阻水厓窮居獨遊

思從曩人邈不可得然雖洛人至今皆以謂無如嚮
時之盛然後知世之賢豪不常聚而交遊之難得爲
可惜也初在洛時已哭堯夫而銘之其後六年又哭
希深而銘之今又哭吾子野而銘之一有於是又知非
徒相得之難而善人君子欲使幸而久在於世亦不
可得一有也字嗚呼可哀也已子野之世曰贈太子太師
諱某魯祖也宣徽北院使樞密副使累贈尚書令諱
遜皇祖也尚書比部郎中諱敏中皇考也曾祖妣李
氏隴西郡夫人祖妣宋氏昭化郡夫人孝章皇后之

姝也妣李氏永安縣太君子野家聯后姻世久貴仕
而被服操履甚於寒儒好學自力善筆札天聖二年
舉進士歷漢陽軍司理叅軍開封府咸平主簿河南
法曹叅軍王文康公錢思公謝希深與今叅知政事
宋公咸薦其能改著作佐郎監鄭州酒稅知閬州閬
中縣就拜秘書丞秩滿知亳州鹿邑縣寶元二年二
月丁未以疾卒于官享年四十有八子伸郊社掌坐
次從次幼未名女五人一適人矣妻劉氏長安縣君
子野爲人外雖愉怡中自刻苦遇人渾渾不見圭角

而志守端直臨事敢

一作果

決平居酒半脫冠垂頭童

然禿且白矣予固已悲其早衰而遂止於此豈其中
亦有不自得者邪子野諱先其上世博州高堂人自
曾祖已來家京師而塋開封今爲開封人也銘曰
嗟夫子野質厚材良孰屯其亨孰短其長豈其中有
不自得而外物有以戕開封之原新里之鄉三世于
此其歸其藏

孫明復先生墓誌銘

并序

先生諱復字明復姓孫氏晉州平陽人也少舉進士

不中退居泰山之陽學春秋著尊王發微魯多學者
其尤賢而有道者石介自介而下皆以弟子事之先
生年逾四十家貧不娶李丞相迪將以其弟之女一作
子妻之先生疑焉介與羣弟子進曰公卿不下士久
矣今丞相不以先生貧賤而欲託以子是高先生之
行義也先生宜因以成丞相之賢名於是乃許孔給
事道輔爲人剛直嚴重不妄與人聞先生之風就見
之介執杖屨侍左右先生坐則立升降拜則扶之及
其往謝也亦然魯人既素高此兩人由是始識師弟

子之禮莫不歎嗟之而李丞相孔給事亦以此見稱於士大夫其後介爲學官語于朝曰先生非隱者也欲仕而未得其方也慶曆三年樞密副使范仲淹資政殿學士富弼言其道德經術宜在朝廷召拜校書郎國子監直講嘗召見邇英閣說詩

一有且字將以爲侍

講而嫉之者言其講說多異先儒遂止七年徐州人

孔直溫以狂謀捕治索其家得詩有先生姓名坐貶

監度州商稅徙泗州又徙知河南府長水縣簽署應

天府判官公事通判陵州翰林學士趙概等十餘人

上言孫某行爲世法經爲人師不宜棄之遠方乃復
爲國子監直講居三歲以嘉祐二年七月二十四日
以疾卒于家享年六十有六官至殿中丞先生在大
學時爲大理評事天子臨幸賜以緋衣銀魚及聞其
喪惻然予其家錢十萬而公卿大夫朋友太學之諸
生相與弔哭賻治其喪於是以其年十月二十七日
塋先生於鄆州須城縣盧一作靈泉鄉之北扈原先生
治春秋不惑傳註不爲曲說以亂經其言簡易明於
諸侯大夫功罪以考時之盛衰而推見王道之治亂

得於經之本義爲多方其病時樞密使韓琦言之天子選書吏給紙筆命其門人祖無擇就其家得其書十有五篇錄之藏于秘閣先生一子大年尚幼銘曰聖既歿經更焚逃藏脫亂僅傳一作得存衆說乘之

汨其原恠迂百出雜僞真後生牽卑習前聞有欲患之寡攻羣徃徃止燎以膏薪有勇夫子闢浮雲刮磨蔽蝕相吐吞日月卒復光破昏傳哉功利無窮垠有考其不在斯文

居士集卷第二十七終

居士集卷第二十八

集二十八

墓誌六首

蔡君山墓誌銘

予友蔡君謨之弟曰君山爲開封府太康主簿時予與君謨皆爲館閣校勘居京師君山數往來其兄家見其以縣事決於其府府尹吳遵路素剛好以嚴憚下吏君山年少位卑能不懾屈而得盡其事之詳吳公獨喜以君山爲能予始知君山敏於爲吏而未知其他也明年君謨南歸拜其親夏京師大疫君山以

疾卒于縣其妻程氏一男二女皆幼縣之人哀其貧以錢二百千爲其賻程氏泣曰吾家素以廉爲吏不可以此污吾夫拒而不受於是又知君山能以惠愛其縣人而以廉化其妻妾也君山聞者語予曰天子以六科策天下士而學者以記問爲事非古取士之意也吾獨不然乃晝夜自苦爲學及其亡也君謨發其遺藁得十數萬言皆當世之務其後踰年天子與大臣講天下利害爲條目其所改更於君山之藁十得其五六於是又知君山果天下之奇才也君

山景祐中舉進士初爲長谿縣尉縣媼二子漁於海而亡媼指某氏爲仇告縣捕賊縣吏難之皆曰海有風波豈知其不水死乎且雖果爲仇所殺若屍不得則於法不可理君山獨曰媼色有冤吾不可不爲理乃陰察仇家得其迹與媼約曰吾與汝宿海上期十日不得屍則爲媼受捕賊之責凡宿七日海水潮二屍浮而至驗之皆殺也乃捕仇家伏法民有夫婦偕出而盜殺其守舍子者君山亟召里民畢會環坐而熟視之指一人曰此殺人者也訊之果伏衆莫知其

以何術得也長谿至今喜道君山事多如此曰前史
所載能吏號如神明不遇此也自天子與大臣條天
下事而屢下舉吏之法尤欲官無大小必得其材方
求天下能吏而君山死矣此可爲痛惜者也君山諱
高享年二十有八以某年某月某日卒今年君謨又
歸迎其親自大康取其柩以歸將以某年某月某日
塋于某所且謂予曰吾兄弟始去其親而來京師欲
以仕宦爲親榮今幸還家吾弟獨以柩歸甚矣老者
之愛其子也何以塞吾親之悲子能爲我銘君山乎

乃爲之銘曰

嗚呼吾聞仁義之行於天下也可使父不哭子老不
哭幼嗟夫君山不得其壽父母七十扶行送柩退之
有言死孰謂天子墓予銘其傳不朽庶幾以此慰其
父母

黃夢升墓誌銘

予友黃君夢升其先婺州金華人後徙洪州之分寧
其曾祖諱元吉祖諱某父諱中雅皆不仕黃氏世爲
江南大族自其祖父以來樂以家貲賑鄉里多聚書

以招延一有字四方之士夢升兄弟皆好學尤以文章意

氣自豪予少家隨州一有字夢升從其兄茂宗官于隨予

為童子一作予時為童子無下四字立諸兄側見夢升年十七八

眉目明秀善飲酒談笑予雖幼心已獨奇夢升一作已能

知夢升為可奇矣後七一作八九年予與夢升皆舉進士於京師

夢升得丙科初任興國軍永興主簿怏怏不得志以

疾一有解字去久之復調江陵府公安主簿時予一作予時謫

夷陵令遇之于江陵夢升顏色憔悴初不可識久而

握手噓噓相飲一作勞以酒夜醉起舞歌呼大噓一作自若

予益悲夢升志雖衰而少時意氣尚在也後二年予

徙乾德令夢升復調南陽主簿又遇之于鄧間常問

其平生所爲文章幾何夢升慨然歎曰吾已諱之矣

窮達有命非世之人不知我一有乃字我羞道於世人也

求之不肯出遂飲之酒復大醉起舞歌呼因一有大字笑

曰子知我者一作獨子知我乃肯出其文讀之一無二字博辨雄

偉其一無此字意氣奔放猶一有若字不可禦予又益悲夢升

志雖困而獨其一無二字文章未衰也是時謝希深出守

鄧州尤喜稱道天下士予因手書夢升文一通欲以

一本改欲以字爲將

示希深未及而希深卒予亦去鄧後之守

鄧者皆俗吏

一作庸人

不復知夢升夢升素剛不苟合負

其所有常怏怏無所施

一作憤憤無所發

卒以不得志死于

南陽夢升諱注以寶元二年四月二十五日卒享年

四十有二其平生所爲文曰破碎集公安集南陽集

凡三十卷娶潘氏生四

一作其娶溫氏生三

男二女將以慶曆

四年某月某日塋于董坊之先塋

一作塋于先塋之側

其弟渭

泣而來告曰吾兄患世之莫吾知孰可爲其銘予素

悲夢升者因爲之銘曰

予嘗讀夢升之文至於哭其兄子庠之詞曰子之文章電激雷震雨雹忽止閬然滅泯未嘗不諷誦歎息而不已嗟夫夢升曾不及庠不震不驚鬱塞埋藏孰與一作予其有不使其施吾不知所歸咎徒爲夢升而悲

大理寺丞狄君墓誌銘

距長沙縣西三十里新陽鄉梅溪村

一作距某縣東南若干里某原

有墓曰狄君之墓者廼予所記

一作紀

穀城孔子廟碑

所謂狄君粟者也始君居穀城有善政嘗已見於予

文及其亡也其子遵誼泣而請曰願卒其詳而銘之以終先君死生之賜烏虜子哀狄君者其壽止於五十有六其官止於一鄉丞蓋其生也以不知於世而止於是若其歿而又無傳則後世遂將泯沒而爲善者何以勸焉此予之所欲銘也君字仲莊世爲長沙人幼孤事母鄉里稱其孝好一作力學自立年四十始

用其兄禁蔭補英州真陽主簿再調安州應城尉能使其縣終君之去無一人爲盜薦者稱其材任治民乃遷穀城令漢旁之民惟鄧穀爲富縣尚書銓吏常

邀厚賂以售貪令故省中私語

一有鄧毅二字

以一二數之

惜爲奇貨而二邑之民未嘗得廉吏其豪猾習以賕
賄汚令而爲自恣至君一切以法繩之姦民大吏不
便君之政者徃徃訴於其上雖按覆率不能奪君所
爲其州所下文符有不如理必輒封還州吏亦切齒
求君過失不可得君益不爲之屈其後民有訟田而
君誤斷者訴之君坐被劾已而縣籍彊壯爲兵有告
訟田之民隱丁以規避者君笑曰是嘗訴我者彼冤
民能自伸此令

一有養民

之所欲也吾豈挾此而報以罪

邪因置之不問縣民繇是知君爲愛我是歲西北初

用兵州縣既大籍彊壯而訛言相驚

一作警

云當驅以

備邊縣民數萬聚邑中會秋大雨霖米踊貴絕粒君

發常平粟賑之有司劾君擅發倉廩君即具伏事聞

朝廷亦原之又爲其民正其稅籍之失而吏得歲免

破產之患逾年政大洽乃修孔子廟作禮器與其邑

人春秋釋奠而興于學時予爲乾德令嘗至其縣與

其民言皆曰吾邑不幸有生而未識廉吏者而長老

之民所記纔一人而繼之者今君也問其一人者曰

張及也推及之歲至于君蓋三十餘年是謂一世矣
嗚呼使民更一世而始得一良令吏其可不慎擇乎
君其可不惜其歿乎其政之善者可遺而不錄乎君
用穀城之績遷大理寺丞知新州至則丁母夫人鄭
氏憂服除赴京師道病卒于宿州實慶曆五年七月
二十四日也曾祖諱崇謙連州桂陽令祖諱文蔚全
州清湘令父諱杞不仕君娶滎陽鄭氏生子男二人
遵誼遵微皆舉進士一無四字女四人長適進士胡純臣
其三尚幼其一無其字銘曰

同治丁丑冬月
彊而仕古之道終中壽不爲夭善在人宜有後銘于
石著不朽

薛質夫墓誌銘

故大理寺丞薛君直孺字質夫資政殿學士贈禮部

尚書簡肅公之子母曰金城

一有郡字

夫人趙氏質夫生

四歲爲殿直公爲叅知政事拜大理評事遷將作監丞景祐元年公薨天子推恩於其孤拜大理寺丞公

以忠直剛毅顯于當世質夫爲名臣子能純儉謹飭好學自立以世其家公塋絳州質夫自京師杖而行

哭至于絳州行路之人皆哀嗟之質夫少多病後公
六年以卒享年二十有四初娶向氏某人之孫某人
之女再娶王氏某人之孫某人之女皆無子嗚呼簡
肅公之世於是而絕孟子曰不孝有三無後爲大此
爲舜娶妻而言耳非萬世之通論也不娶而無後罪
之大者可也娶而無子與夫不幸短命未及有子而
死以正者其人可以哀不可以爲罪也故曰孟子之
言非通論爲舜而言可也質夫再娶皆無子不幸短
命而疾病以死其可哀也非其罪也自古賢一作聖人

君子未必皆有後其功德名譽垂世而不朽者非皆因其子孫而傳也伊尹周公孔子顏回之道著于萬世非其家世之能獨傳乃天下之所傳也有子莫如舜而瞽不得爲善人卒爲頑父是爲惡者有後而無益爲善雖無後而不朽然則爲善者可以不懈爲簡肅公者可以無憾也使簡肅公無憾質夫無罪全其身終其壽考以從其先君于地下復何道哉某娶簡肅公之女質夫之妹也常哀質夫之賢而不幸傷簡肅公之絕世閔金城夫人之老而孤故爲斯言庶幾

以慰其存亡者已悲夫銘曰

死而有祀四世之間死而不朽萬世之傳簡肅之德
質夫之賢雖其閔矣久也其存

隴城縣令贈太常博士呂君墓誌銘

君

一本上有呂字

諱士元字佐堯江寧人也咸平二年舉明

經爲潭州醴陵尉廬州司理叅軍寧州彭原廣州四
會縣令又爲湖州司理泗州錄事叅軍吉州太和秦
州隴城縣令以疾卒于官享年六十有五娶閻氏生
子四人曰淵曰溱曰淙曰淇閻氏年七十三後君十

五年以卒子淙後其母三月卒以慶曆八年十二月二十日以閻氏之喪合葬于楊州江都縣東興鄉馬坊村先塋之次君爲人剛介有節長於爲政醴陵太和皆大邑民喜鬪訟往往因事中吏以法吏多不免而君日與長吏爭曲直下爲邑民伺候終無毫髮過失可得而民卒愛思之四會近海俗雜蠻夷君尤知其人之利害事所經決後有欲輒改更者民必自言于廷曰此呂君所決豈可動邪後人亦莫能改也君仕三十餘年以一縣令之祿衣食其族四十餘口雖

薄而必均夫人閻氏尤能爲勤儉子淵溱皆舉進士
溱有賢材以文學選中第一今淵爲祕書丞溱著作
卽直集賢院以溱官得封贈贈君太常博士母夫人
封天長縣太君嗚呼呂君官雖卑惠於其民足以爲
政祿雖薄周於其族足以爲仁身雖不顯而有子以
大其門足以彰爲善之効君之皇祖諱裕贈兵工一作
部尚書皇考諱文膺官至太子左贊善大夫自宋興
百年間呂姓之族五顯于世君之叔父刑部侍郎集
賢院學士文仲實爲先朝名臣而今君有賢子又將

頌呂氏之族于後於其塋也是宜銘以誌其銘

一作墓

曰

善無不報報不必同或在其後或及其躬積久發遲

逾

一作愈

遠彌昌如其不信考此銘章

尹師魯墓誌銘

師魯河南人姓尹氏諱洙然天下之士識與不識皆稱之曰師魯蓋其名重當世而世之知師魯者或推其文學或高其議論或多其材能至其忠義之節處窮達臨禍福無愧於古君子則天下之稱師魯者未

必盡知之師魯爲文章簡而有法博學彊記通知今

古

一作古今

長於春秋其與人言是是非非務窮盡道理

乃已不爲苟止而妄隨而人亦罕能過也遇事無難

易而

一無此字

勇於敢爲其所以見稱於世者亦所以取

嫉於人故其卒窮以死師魯少舉進士及第爲絳州

正平縣主簿河南府戶曹叅軍邵武軍判官舉書判

拔萃遷山南東道掌書記知伊陽縣王文康公薦其

才召試充館閣校勘遷太子中允美章閣待制范公

貶饒州諫官御史不肯言師魯上書言仲淹臣之師

友願得俱貶監郢州酒稅又徙唐州遭父喪服除
復得太子中允知河南縣趙元昊反陝西用兵大將
葛懷敏奏起爲經略判官師魯雖用懷敏辟而尤爲
經略使韓公所深知其後諸將敗於好水韓公降知
秦州師魯亦徙通判濠州久之韓公奏得通判秦州
遷知涇州又知渭州兼涇原路經略部署坐城水洛
與邊臣一作將異議徙知晉州又知潞州爲政有惠愛
潞州人至今思之累遷官至起居舍人直龍圖閣師
魯當天下無事時獨喜論兵爲叙燕息成二篇行于

世自西兵起凡五六歲未嘗不在其間故其論議益

一作亦精密而於西事尤習其詳其為兵制之說述戰

守勝敗之要盡當今之利害又欲訓士兵代戍卒以

減邊用為禦戎長久之策皆未及施為而元昊臣西

兵解嚴師魯亦去而得罪矣然則天下之稱師魯者

於其材能亦未必盡知之也初師魯在渭州將吏有

違其節度者欲按軍法斬之而不一作未果其後吏至

京師上書訟師魯以公使錢貸部將一作訟師魯自盜貶崇

信軍節度副使徙監均州酒稅得疾無醫藥昇至南

陽求醫疾革隱

一作憑

几而坐顧稚子在前無甚憐之

色與賓客言終不及其私享年四十有六以卒師魯娶張氏某縣君有兄源字子漸亦以文學知名前一年歲卒師魯凡十年間三貶官喪其父又喪其兄有子四人連喪其三女一適人亦卒而其身終以貶死一子三歲四女未嫁家無餘貲客其喪于南陽不能歸平生故人無遠邇一作近皆往賻之然後妻子得以其柩歸河南以其年某月某日塋于先塋之次余與師魯兄弟交嘗銘其父之墓矣故不復次其世家焉銘

曰
藏之深固之密石可朽銘不滅

居士集卷第二十八終

蘇之禁固之密不可洩也

曰

居士集卷第二十九

集二十九

墓誌六首

尚書主客郎中劉君墓誌銘

并序

君諱立之字斯立姓劉氏吉州臨江人也曾祖諱達
祖諱璵當五代時避亂皆不仕父諱式官至尚書工
部員外郎掌三司磨勘十餘年能其職世以其官名
其家君少孤能自立舉進士爲福州連江尉睦州青
溪主簿宣州南陵令改大理寺丞知婺州金華縣大
子中舍知梓州中江縣通判瀘州瀘州接西南夷常

用武人爲守而夷數怨叛議者以謂武人不習夷情
以生患宜得能吏通判州事君始以材選至則爲明
約束止侵欺曰必使信自我始夷人安之凡君之所
更立至今用一作以爲法而夷亦至今不叛通判常

州知高郵軍累遷殿中丞國子博士尚書虞部北部

員外郎知潤州皆有能政以能選爲提點福建路刑

獄察獄之冤死者奏黜知泉州蘇壽與其通判張太

冲福建七州皆震悚

一作慄

御史考其課爲天下第一

遷司勳員外郎開封府判官荆湖北路轉運使坐舉

官免杜衍李若谷范仲淹等皆言方天下多事時一作

方今天下多事如劉某者不宜久居于家一作外乃復起爲此

部員外郎知漣水軍言事者以謂自元昊反一方用

兵而天下之民弊財絀於上而盜起於下然州縣吏

猶習故態苟簡弛壞一作漫如無事時於是大選轉運

使以按察諸路君以選爲荆湖北路轉運使他路繩

吏或過急而被按劾者多不服君所舉察簡而一作其

賢否無不當是時廣西湖南夔峽諸蠻皆叛亂君所

部下溪辰州彭氏蠻亦折誓柱招集亡命移書州縣

州縣使人往者

一無者字

輒囚辱

一作侮慢辱囚

辰昂澧

一作

辰昂澧

三州守吏皆言蠻叛有

請加兵詔書問君君

曰蠻道辰溪落鶴水悍激不可上其必不敢輒

出而辰州土丁勝兵者三萬人宜積粟利兵爲備而

已因言蠻類雖人宜鳥獸畜其小嘲啾拉觸驅而遠

之耳若必擾伏制從至戾其性則噪呼咆競駭起而

奔突乃欲力追而捕之則散漫山林我弊而彼逸凡

湖廣之患皆如此也天子以其言然下三州毋得妄

動一聽君所爲而蠻亦卒無事後爲司勳員外郎判

三司度支句院改鹽鐵判官假太常少卿接伴契丹
使者遂送之明年遂使于契丹還言澶魏築河堤非
其時必難成雖成必決不如因其所趣而導之利後
河果決商胡君仕宦四十年不營產業自復爲司勳
員外郎遂不復求磨勘凡三遷皆爲知者所薦爲人
沉敏少言笑與人寡合而喜薦士士由君薦者多爲
聞人天章閣待制杜杞田瑜是也轉運鹽鐵皆掌財
賦而君常以民爲先其調率有可免免之其不得已
一有必爲處畫使吏不能因緣而民不重費一作其
費字

守官不爲勢牽

一作奪

不爲利奪

一作牽

爲青溪主簿時

知州事李階通判朱正辭者皆

一有世字

號強吏喜負其

能以折辱下士士皆承望奔走不暇獨君數以事爭

而二人者常輒屈其始皆怒後卒歎服共薦之其通

判瀘州州有鹽井蜀大姓王蒙正請歲倍輸以自占

蒙正與莊獻明肅

一有皇字

太后連姻轉運使等皆不敢

與奪君曰倍輸於國家猶秋毫耳奈何使貧民失業

遂執不與鄂州官歲市茶五百

一作十

萬斤君爲轉運

使時三司請益

一無益字

市一百萬君上言曰鄂人利茶

以爲生今官市之多反以茶爲病縱不能減奈何增
之天子爲君許寬一年君曰事苟可行何必一年如
其不可雖寬十年不可也爭之不已後卒爲君罷之
君在鹽鐵次當舉官掌其事

一作某
人爲

三司使欲用其

私人以空名狀請君署君不肯署而求舉者姓名三
司使不悅卒命他判官舉之其後三司使竟坐所舉
罷慶曆八年五月遷主客郎中益州路轉運使其年
十一月七日卒于官享年六十有四夫人臨沂縣君
王氏贈尚書右僕射礪之女先君若干年卒五子元

國朝文忠公全集卷二十九
四
卿真卿亦早亡敝今爲大理評事敝鳳翔府推官皆
賢而有文章放太廟齋卽尚幼四女三適人一尚幼
以某年某月某日塋于某縣某鄉某原銘曰
劉氏顯晦以時亂治有聲王朝自君再世惟德之貽
是將久大曷知其然君實有子

翰林侍讀學士右諫議大夫楊公墓誌銘

慶曆八年春翰林侍讀學士右諫議大夫楊公年六
十有九告老卽以工部侍郎致仕歸于常州其行也
天子召見宴勞賜以不拜公卿大夫咸出餞于東門

瞻望咨嗟相與言曰楊公歸哉於公計爲可榮於國
家計爲可惜其明年九月十三日公疾革出其兵論
一篇示其子忱慥而授以言曰一有臣聞二字臣子雖死不
敢忘其君父者天下之至恩大義也今臣偕不幸猶
以垂閉之口言天下莫大之憂爲陛下無窮之慮者
其事有五以畢臣志死無所恨惟陛下用臣言不必
哀臣死也言訖而卒不及其私忱慥以其語并其兵
論以聞天子震悼顧有司問可以寵公者有司舉故
事以對天子曰此何足以慰吾思乃詔特贈公兵部

侍郎公少師事种放學問爲文章長於議論好讀兵
書知古兵法以謂士不兼文武不足任大事當四方
無事時數上書言邊事後二十餘年元昊叛河西契
丹舉衆違約三邊皆警天下弊於兵公於此時耗精
疲神日夜思慮創作兵車陣圖刀楯之屬皆有法天
子以步卒五百如公之法試于庭以爲可用而世多
非其刀楯修嘗奉使河東得邊將王吉言元昊出兔
毛川爲吉所敗者用楊公刀一有楯也蓋世未嘗用其
術爾然公素剛一作剛直少合而議者不一故不得盡用

其言夏竦經畧陝西請益置土兵公言竦據內地無
破賊之謀而坐請益兵蓋虞敗事則欲以兵少爲解
竦復論公不忠沮計公不能忍以語詆之其後三路
農民壯者咸墨爲兵公又言兵在精不在衆衆而不
練則不整而易敗困國而難供時自將相大臣議者
皆務多兵獨公之論能如此劉平兵敗元昊圍延州
甚急而救兵不至公在河中乃僞爲書馳告延州救
兵十萬至矣因命旁郡縣具芻糧什器如其數以俟
已而元昊亦解去後公守并州即詔公爲并代麟府

路經畧安撫招討等使兼兵馬都部署公執勅告其羣吏曰天子用我矣然任其事必圖其効欲責其効必盡其方乃列六事以請曰能用臣言則受命不然則已朝廷難之公論不已坐是徙知邢州公志之不就皆此類也公嘗爲御史章獻太后兄子劉從德爲團練使以卒其門人親戚廝養用從德拜官爵十有數十人馬李良以劉氏壻爲龍圖閣直學士公上書言漢呂太后王祿產欲彊其族而反以覆宗唐武三思楊國忠之禍不獨其身幾亡其國太后大怒貶監舒

州酒稅居二歲復召爲御史言事愈切公祥符元年
進士及第以上書言事真宗竒之召試不赴拜著作
佐郎累官至工部侍郎爲天章閣待制龍圖閣樞密
直學士遂侍講于翰林嘗爲審刑院詳議官知淮陽
江陰軍三司度支判官知御史雜事判吏部流內銓
三司度支副使河北河東都轉運使知河中府陝并
邢滄杭五州所_{能績}一作稱爲人廉潔一作平剛
直少屈而難犯其仁心愛物至其有所能容人多所
不及也公一有諱借二字字次公曾祖諱偉祖諱某父諱守

慶初娶張氏又娶李氏又娶李氏

一無此人字

又娶王氏

太原郡君

亦有六孫景略景亮景謨景道
景直景彥十四字
直一作宣

公卒之明

年秋其子忱以其喪歸于河南又明年二月十七日

塋于洛陽縣宣武管平洛鄉之先塋公有文集十卷

兵書十五卷讀其書可以見公之志考其始終之節

可以知公之心嗚呼可謂忠矣修爲諫官時嘗與公

爭議

一作言

于朝者而且未嘗識公也及其塋也其子

不以銘屬於他人而以屬修者豈以修言爲可信也

歟然則銘之其可不信銘曰

遠矣楊氏有來其

一作其來有

始赤泉侯功與漢俱起震

官太尉四世以公於陵正直僕射于唐師復理鄉振

左拾遺文蔚獲嘉其後益衰避亂中州曾祖始

一作遷

南祖屈偽邦令于烏江又適南粵皇考是生晦

一作顯

顯有時發于皇明在考司馬始仕坊州遂家中

一作內

部道德之優司馬四子唯公克大非徒大之將又長

之世有官族孰無繫譜或絕於微或亡其序不絕不

亡由屢有人誰如楊世愈久而蕃次第

一作後嗣

弗迷昭

穆繇聯公其歸此

一作乎

安千萬年

供備庫副使楊君墓誌銘

君諱琪字寶臣姓楊氏麟州新秦人也新秦近胡以
戰射爲俗而楊氏世以武力雄其一方其曾祖諱弋
信爲州刺史祖諱重勲又爲防禦使太祖時爲置建
寧軍於麟州以重勲爲留後後召以爲宿州刺史保
靜軍節度使卒贈侍中父諱光宸以西鎮供奉官監
麟州兵馬卒于官君其長子也君之伯祖繼業太宗
時爲雲州觀察使與契丹戰歿贈太師中書令繼業
有子延昭真宗時爲莫州防禦使父子皆爲名將其

智勇號稱無敵至今天下之士至於里兒野豎皆能
道之君生於將家世以武顯而獨好儒學讀書史爲
人材敏謙謹沈厚意恬如也初以父卒于邊補殿侍
後用其從父延昭任爲三班奉職累官至供備庫副
使階銀青光祿大夫爵原武伯李溥爲發運使以峻
法繩下吏凡溥所按行吏皆先戒以備而溥至多不
免其黜廢者數百人其聞溥來輒惶懼自失至有投
水死者君時年最少爲奉職監大通堰去溥治所尤
近溥嘗夜拏輕舟猝至按其文簿視其職事如素戒

以備者溥稱其才君所歷官無不稱職其後同提點
河東京西淮南三路刑獄公事君歎曰吾本武人豈
足以知士大夫哉然其職得以薦士亦吾志也其所
舉者二百餘人徃徃爲世聞人嘗坐所舉一人罰金
君喜曰古人拔士十或得五而吾所薦者多矣其失
者一而已君少喪父事其母韓夫人以孝聞後以恩
贈其一無此字父左驍衛將軍母夫人南陽縣太君初娶
慕容氏又娶李氏有子曰畋賢而有文武材今爲尚
書屯田員外郎直史館君以皇祐二年六月壬戌卒

于淮南年七十有一皇祐三年十月甲申畋以其喪
合慕容氏之喪塋于河南洛陽杜澤原銘曰

楊世初微自河西彎弓馳馬耀

一作耀

邊陲桓桓侍中

國并毗太師防禦傑然奇名聲累世在羌夷時平文
勝武力衰溫溫供備樂有儀好賢舉善利豈私愷悌
君子神所宜康寧壽考順全歸有畋爲子後可知

太子中舍王君墓誌銘

王君之皇考曰贈衛尉少卿諱某皇妣曰南充縣太
君胥氏皇祖諱某皇曾祖諱某君諱汲字師黯娶胡

氏

一有
曰字

安定縣君子男三人女五人男曰尚恭尚喆

尚辭初天聖明道之間予爲西京留守推官時王君
寓家河南其二子始習業國子學日從諸生請學於
予較其藝常爲諸生先而尚恭尤謹飭儼然有儒者
法度予固竒王君之有是子也以故與君游而君性
簡質重然諾臨事而敏與之游者必愛其爲人其後
二子者果皆以進士中第予亦罷去不復遇王君且
七年矣而尚恭來請曰不幸吾先人之亡將以今年
某月甲子塋于河南某縣某鄉之某原宜得銘于石

以誌諸後世

一有子嘗嘉尚恭而從王君遊十字

乃爲次其世而作銘

以遺之云

惟王氏之先長安萬年四代之祖刺史潯州遭巢猾
唐得果而留卒塋西充爲鄉壁公王孟有蜀或家或
祿三世不遷自君東還始家河南廣文之生舉三不
中任仕以兄主簿之卑試原武密晉城是令政專自
出令政有稱遷理之丞藍田夏雒三邑皆聞壽五十
九終中舍人在雒逢饑餉粟不殍褒功勸吏天子有
詔雒人染癘躬之不避以死勤民在法宜紀刻詩同

藏惟世之揚

尚書工部郎中歐陽公墓誌銘

歐陽氏世爲廬陵人廬陵於五代時屬僞吳故歐陽氏在五代無聞者淳化三年修仲父府君始以進士

中乙科

一作太宗時修仲父府君始以進士中淳化三年乙科

其後爲御史有

能名真宗嘗自擇御史府君以秘書丞

一有見見者召字

數人皆進自稱薦惟恐不用府君獨立墀下無所說

一作明

一作

日拜監察御史中丞王嗣宗指曰是獨

立墀下者真御史也

一有會字絳州守齊化基犯法制劾

其事化基嗣宗素所惡者諷之欲使蔓其獄府君有一

遽拒

二字曰如詔

一作如制所劾

而已嗣宗怒及獄上奏用他吏

覆之

一有他吏二字

索其家得

一有金銀二字

銅器十數府君坐鞠

獄不盡免官明年復得御史監蘄州稅又明年遷殿

中侍御史左巡使居二歲奏事殿中真宗識之勞曰

御史久矣亦勞乎問何所欲府君謝不任

一作稱

職而

已後數日真宗語宰相與轉運使宰相疑其有求而

不先白已對以員無闕復使與一大郡宰相召至中

書問御史家何在欲郡孰爲便對曰無不便宰相怒

與海州又移睦州天禧元年入遷侍御史二年出知

泗州先是京師歲旱有浮圖人斷

一作有僧某者用浮屠術斷一臂

禱雨官爲起寺於

一有淮上二字

龜山自京師王公大臣皆

禮下之其勢傾動

一無動字

四方又誘民男女投淮水死

曰佛之法用此得大利而愚民歲死淮水者幾百

一作

十常數

人至其臨溺時用其徒倡呼前後擁之以入至

有自悔欲走者

一無者字

叫號不得免

一作而叫號不得免者

府君

聞之驚

一作大駭

曰害有大

一作甚

於此邪盡捕其徒詰其

姦民誅數

一作十餘

人遣還鄉里者數百人遂

一作而

毀其

寺入轉尚書司封員外郎三司戶部判官六年

南東路轉運使前爲使者以市舶物代俸錢其利三

倍府君歎曰

一作嶺南舊以市舶司物代轉運使俸錢其利三倍前爲使者相襲久而不變

府君至則歎曰

利豈吾欲邪使直以錢爲俸今上即位就轉

工部郎中秩滿以一弊舟還無一海上物歸朝賜金

紫爲兩浙路轉運使以足疾求知江州天聖四年又

求分司未得命以某年二月某日卒於江州之廨享

年六十有八以某年某月某日塋某所曾祖諱某祖

諱某僞唐吉州軍事判官父諱某僞唐屯田員外郎

娶朱氏封金壇縣君先府君以卒嗣子鑒一有今字爲右

侍禁武昌巡檢女二人長適某次未嫁府君諱載字

則之性方直嚴謹

一有美儀容

治身儉薄簡言語爲政務

清淨平居歛色而

一作常正衣獨

坐如對大賓終日不少懈

一作色不少

弛人用憚之薦舉下吏人未嘗

一作不之

知後有

知者來謝皆拒不納所至官舍未嘗窺園圃至果爛

墮地家人無敢取者其清如此銘曰

唐隳盜猖土裂四

一作食有一

方鍾氏於洪入

一作八

州自

王傳死子時敗臣于楊自梁迄周廬陵僞邦歐陽是

家世以不章

一作彰

違命之侯廬陵王土歐陽有聞始

我仲父以貢中科來者繼武仲父之材御史其能廉
清儉恭直躬以行銘以藏之子孫之承

少府監分司西京裴公墓誌銘

君諱德裕

一作谷

字某姓裴氏河中萬泉人也其九世

祖耀卿爲唐名臣曾祖諱某祖諱某贈左千牛衛大
將軍父諱濟以智勇事太宗皇帝從李繼隆擊契丹
於唐河屢立戰功守鎮定十餘年威惠著于北邊咸
平中李繼遷叛河西以內客省使順州防禦使守靈

州繼遷連歲攻之城守堅不能下繼遷擊破清遠軍而糧道絕救兵不至城乃陷遂歿于賊贈鎮江軍節度使累贈尚書令兼中書令追封吳國公方其歿也詔錄其子孫君以長子自四門助教拜太子右贊善大夫累官至少府監階朝奉大夫勲上柱國爵開國侯以老分司西京許居于京師某年某月某日以疾卒於家享年七十有六君爲人質重寬易居父喪盡哀宗族稱其孝得父金帛悉分諸弟不有其一錢其爲吏廉清不擾歷監藥蜜庫店宅務泗

一作明

州糧料

院宿州酒稅知明州奉化興元南鄭二縣同判吏部
南曹通判南京留守司知蓬絳解虢澤沂六州皆有
能政喜自晦默如不能言予嘗問其解之鹽池君解
析纖密自前世功利因革損益條布如在目前寶元
中嘗上書論茶鹽利害多所施行其聽獄訟敏決數
得疑獄皆強吏所不能辨者及平居議法必以仁恕
爲本君初名德昌前娶康氏後娶趙氏封平原郡君
有賢行子男三人士倫士林大理寺丞士傑衛尉寺
丞女八人長適右侍禁張用之次適大理寺丞薛寅

集賢校理孫錫大理寺丞丁某殿中丞孫祖慶庫部
員外郎張承懿集賢校理王益柔以某年某月某日
塋君于河南登封縣之某原其孤士傑來請銘以塋
銘曰 裴始絳人於唐顯聞偉歟文獻八世有孫守
節蹈義厥聲以振忍生而耻亦終以死死義之榮令
名不已豈惟令名報德之隆延延裴氏其賴無窮少
府之賢寬恭信厚保身承家多其祿壽壽豐于躬祿
及其嗣爰告後人俾知所自

居士集卷第二十九終

